

四
念
處
卷

四念處卷第一

隋天台山修禪寺智者大師說

門人章安灌頂記

一切諸法。皆不可思議。不可思想圖度。不可言語商略。何以故。言語道斷。故不可議。心行處滅。故不可思。大經云。生生不可說。生不生不可說。不生不生不可說。不生不生不可說。既不可說。亦不可思。大品云。色不可說。乃至識不可說。眼不可說。乃至意不可說。色不可說。乃至法不可說。眼界不可說。乃至法界不可說。當知五陰。十二入。十八界。皆不可說。此指俗諦不可說也。四念處不可說。乃至根力覺道。皆不可說。須陀洹不可說。乃至阿羅漢亦不可說。此指真諦不可說。佛十力不可說。四無畏。十八不共。三十二相。八十種好等。皆不可說。此指中道第一義諦不可說也。大論云。實法不顛倒。念想觀已除。言語法皆滅。無量眾罪除。清淨心常一。如是尊妙人。則能見般若。此總指三諦

不可思說也。法華云。諸法寂滅相。不可以言宣。又云。是法非思量分別之所能解。當知不可以心思口議。亦不可以無心口思議。不可以有無。不可以非有。非無。非方。非數。非法。非論。寂然無爲。群經之極說。眾聖之誠言。深深若此。明明若彼。境智雙冥。能所俱寂。淨名諸菩薩。以言言於無言。文殊以無言言於無言。淨名不以言不以無言。默然無言。文殊歎曰。真入不二法門。當知玄妙玄妙。不可思議。復不可思議。但可冥悟。不可以彰辯。問若不可說不可說。何故言滿龍宮。若不可思不可思。何故雪山深思此義。答。佛常樂寂而哀於蒙。欲訥於言而敏於行。慈悲權巧。指畫虛空。擣方示月。作種種說。或作生生說。或作生不生說。或作不生說。或作不生不生說。或作不生不生說。或作非一種。或作有說。或作無說。或作亦有亦無說。或作非有非無說。引諸根性。從四方門。入清涼池。聞悅善生。惡亡理顯。得四利益。餘三句亦如是。欲令此義明了。更

引諸經。大經名諸佛法界。佛卽果人。法界卽果法。於無果中而作果說。大品云。諸法實相慧。名摩訶般若。此慧有能度所度。今取能度名般若。於無因中而作因說。大集云。菩薩觀一切法平等。眾生性同涅槃性。若觀平等卽因也。同涅槃卽果也。此約亦因亦果說也。華嚴云。遊心法界如虛空。則知諸佛之境界。遊心卽因。佛境界卽果。如前說。法華云。是法不可示。言辭相寂滅。此卽非因非果說也。法門甚眾。廣說令智退。略則義不周。我今處中說方則四句。略則因果。聞而修行。名之爲因。與法相應。名之爲果。約果更修。故言因。從因又得果。故言果。若初若後。究竟寂滅。故言非因非果。初生生四門。亦作因果四說。乃至不生不生。亦作四門。門門亦作因果之說。一一說中。悅種種眾生。立種種善根。治種種罪垢。從於種種入第一義。故初中後重說無咎。說卽是教。稟教修觀。以修觀故。名修四念處。此義廣可思之。元佛出世。爲一大事因緣。開

發眾生諸覺寶藏。譬如日出。先照高山。先喜先利先治。先益。大經云。若欲盛貯。先用完淨。若欲耕墾。先種肥良。若欲乘御。先駕調壯。若欲教詔。先教孝明。斯皆積習深厚。煩惱障薄。先聞雷震。先沐甘雨。先出籠樊。先獲正觀。皆由往昔數數勤修。今世道成。最初四益。其未度者。更設方便而塗慰之。隱其無量神德。以貧所樂法。趣波羅奈。便有涅槃音。法僧差別名。則是從頓。次漸而調熟之。今從此義。麤爲四說。說卽是教。依教修觀。卽是四種四念處。所爲生生四念處。乃至不生不生四念處。亦名三藏通別圓四念處。若三藏四念處。更爲三大意。五停。四念。所言三者。其義有八。謂理。教。智斷。行位。因。果。理三者。聲聞謂理在正使外。緣覺謂理在習氣外。菩薩謂理在正習外。三人出三種外。方乃見理。故言理三也。教三者。聲聞稟四諦。緣覺稟十二緣。菩薩稟六度。聲聞修總相智。緣覺修別相智。菩薩修總別智。聲聞斷正。緣覺斷習。菩薩斷

正習。聲聞爲自修戒定慧。緣覺爲自修獨善寂。菩薩爲
眾生修六度五通。聲聞住學無學。緣覺住無學。菩薩三
僧祇登道場。聲聞帶果行因。緣覺望果行因。菩薩伏惑
行因。聲聞斷正。如燒木爲炭。緣覺斷習。如燒木爲灰
。菩薩正習盡。如燒木無灰炭。具此八三。故言三也。
藏者。謂修多羅藏。毗尼藏。阿毗曇藏。修多羅藏。謂
四阿含。增一阿含。說人天因果。長阿含。破邪見。禰
阿含。明諸禪法。中阿含。明諸深義。具如彼云云。毗
尼藏。明持犯輕重。如律藏中說。阿毗曇藏。名無比分
別。無比分別云云。大經云。此是契經甚深之義。此是
戒律輕重之義。此是阿毗曇分別法句。皆佛自釋三藏名
也。今不具論。然佛臨涅槃。阿難心沒憂海。阿菴樓駄
語云。汝持佛法人應問將來事。云何啼哭。阿難卽醒悟
。乃問四事。佛皆具答。今出其二。比丘當依四念處行
道。依波羅提木叉住。木叉有二。一舊二客。舊又二。
一邪二正。正謂十善。邪謂鷄狗牛馬等云云。定有二。

一舊二客。舊又二。一正二邪。正謂三四十二。邪謂邪
禪鬼定等云云。慧有二。一舊二客。舊又二。一正二邪
。正謂識因識果。邪謂撥無因果。三種舊邪墮三惡道。
佛棄而不用。三種舊正。昇三善道。佛會而取之。更說
三種客法。客戒者。謂三歸。五戒。二百五十等。客定
者。謂九想。八背等。客慧者。謂四諦智也。佛之遺囑
以戒爲師。師訓七支。弟子奉行。莫令污染。仁讓貞信
。和雅真正。戰戰兢兢。動靜和諧。故言以戒爲師也。
依木又住者。木又名保得解脫。若依木又住者。保脫世
間熱惱。所謂居家逼迫牢獄熱惱。妻子柳檔。繫縛熱惱
。財業產貨怨賊熱惱。王難逼迫水火熱惱。若依木又。
保脫如此熱惱也。又復住者。未來住安樂之處也。若能
住戒者不耐惡聲。惟欣善法。未來保住四天王住處也。
若住戒者。則是供養三寶。供養父母。未來保住三十三
天也。若住戒者。能發麤住。保得住於炎摩天住處也。
若住戒者。能發細住。保住兜率陀天。若持戒者。能得

略有三種。一一切智六師故。六臣白王。我師是一切智。王若見者。罪垢消滅。此執世性也。大論云。得宿命智。見八萬劫事。過是已不復能知。但見初受胎身中陰之識。而自思惟。此識不應無因緣。憶想分別。有法名世性。非五情所知。極微細故。於世性冥初生覺。覺卽中陰識。從覺生我。從我生五塵。謂色聲香味觸。從聲塵生空大。從聲觸生風大。從色觸生火大。從色聲觸味生水大。從色聲觸味香生地大。從空生耳根。從風生身根。從火生眼根。從水生舌根。從地生鼻根。如是漸漸從細至麤。還從麤至細。譬如泥丸中具有餅盆等性。餅盆等破還爲泥。都無所失。世性是常。無所從來。此僧法所執也。復有執微塵。微塵常不可破。至微細故。但待罪福因緣。因緣和合故有身。若天人地獄等。以父母故。罪福盡則散壞。復有執自然爲世界始。貧富貴賤。非願行所得。復有人言。天主是世界主。始造吉凶。滅時還天攝取。復有人言。世世受苦樂盡自到邊。譬如山

上投縷。丸盡自止。受罪福命歸於盡。是諸邪外。皆於
禪定知見。不從他聞。亦不從韋陀中聞。執此明利。故
云是事實餘妄語。卽此意也。復計自在天。復計父母等
。皆是一切智之執也。二者神通六師。修得五通。停河
在耳。十二年變釋爲羊。千根在體。毗富羅城。變爲鹵
土等是也。三者韋陀六師。解星文地理。十八大經。知
吉凶等是也。雖知世性無神通是小。知世性通是次。知
三種備足是大六師。阿毗曇中明三種念處。謂性。共。
緣。對破此三外道。有人釋性念處。謂觀無生。淺名爲
生。深細觀無生。見細法皆生死苦諦。名性念處。有人
專用慧數。緣無生空理。發真斷結。得慧解脫羅漢。對
破邪因緣。無因緣。顛倒執性。一切智外道也。共念處
者。以禪定助道。正助合修。亦名事理共觀。發得無漏
三明六通八解。成俱解脫羅漢。對破根本愛慢得五通外
道也。緣念處者。緣佛三藏十二部文言。及一切世間名
字。所緣處廣。非如支佛出無佛世。不稟聲教。但作神

通。以悅眾生。不能說法。緣念處人。了達根性。善知四辯。堪集法藏。成無疑大羅漢。對破世間韋陀星文地理。文字鄙狹。當知邪正真偽。猶金比鐵。螢日跡海。故大經云。於諸想中。無常爲最。於諸耕中。秋耕爲最。於諸跡中。象跡爲最。無常譬性。耕譬神通。跡譬文字也。經云。諸優婆塞。善解諸法對治之門。所謂常無常等。故知心行理外。未入正真。破邪之義可解。二明五停心者。謂數息不淨。慈心界方便因緣觀也。停名停住。行人聞生滅四諦。發心觀苦諦。欲出生死。爲煩惱風。搖動慧燈。照境不了。爲除此障。修五停心。息門有數隨觀等。不淨門有九想八背等。慈心界方便十二因緣。皆如禪門中廣說。今不委論。此五停門。復有五意。謂對轉不轉兼。亦對亦轉亦不轉亦兼對者。數息對覺觀。不淨對貪欲。慈心對瞋恚。方便對我因緣對癡。對治若成。煩惱不起。又發禪定。禪定持心。安隱出入。故云五停心也。心既調定。乃可習觀。若對治未益。更

須用後四種治之。行者善用四隨。巧修五治。煩惱不能障。觀心停住。卽入初賢位。具如禪門廣說。問。此中何不用念佛停心。答。作五度門則不用。作六度門卽須用。因緣對等分。念佛對逼迫障。云云。問。停心得住。名初賢者。今人數息。或得不淨。或二三四五。是爲賢不。答。若以愛見心修禪。乃至非想。尚非初賢。況數息不淨。乃發淺法。而名爲賢耶。經說多修福德名爲愚。多修智慧名爲狂。豈可以狂愚爲賢。舊云隣聖爲賢。此語大高。今言善直曰賢。應作四句。一隨愛見破戒亂心。此非直非善。如無目無足。不能入清涼池。二持戒修禪而生邪見。此善而不直。亦不名賢。如有足無目。亦不能入清涼池。三信心正見。而破戒心亂。此直而不善。亦非是賢。如有目無足。不能入清涼池。四信解正智。得佛教意。持戒清淨。修安般不淨等觀。心得停住。名直名善。有目有足。能入清涼池。是四初賢善直義成也。問云。何名得佛教意。答。中論云。佛去世後

像法中人。人根轉鈍。深著諸法。求十二因緣。五陰。十二入。十八界等。決定相。但著文字。此不知佛意。佛意者。生生不可說。有因緣故。作生生說。令物離生死得涅槃。若著文字。興毀諍競。則三界火猛。不得佛意。非賢人也。云云。三釋四念處。四者數也。念者觀慧也。處者境也。數有開合。若迷心不迷色。則數爲五陰。若迷色不迷心。則數爲十二入。若俱迷者。則數爲十八界。如毗婆沙也。云云。今言四者。人於五陰起四倒。於色多起淨倒。於受多起樂倒。於想行多起我倒。於心多起常倒。舉四倒故言四也。若相生次第。應言識受想行色。若麤細次第者。應言色行想受識。今從語便。故言身受心法。文從起倒。多如前說。然三藏要意。正厭生死。欣入涅槃。須信解正因緣。三世二世一世。十二因緣。因緣支是四諦。無明行愛取有是集諦。五果是苦諦。知苦斷集是道諦。無集苦是滅諦。識此無明老死。破外人邪無因緣生一切法。種種顛倒。不隨虛想邪。

僻。深信正因緣也。二真正發心者。驚覺無常之火。燒諸世間。一心求出。剎那不懈。莫念名利。如麀在圍。跳透求脫。似犢失母。惆悵嗚呼。修習禪慧。如救頭然。云云。三巧修定慧。出世之行。欲界亂心。如風中燈。是故依靜求定。若定無慧。如闇中無所見。巧修二法。如二手互相揩摩。亦如乘馬。亦愛亦策。善用四隨信法兩行八句得所。云云。四破法遍者。觀因緣生滅。破一切愛見戲論諸法。遍知一一愛見中。有四諦。十二因緣。六波羅蜜。以其藥去病除。云云。五善知通塞者。知一切愛見之法。皆有道滅之理名通。悉有苦集名爲塞。六善修道品者。於諸見動而修念處。若別若總。乃至三解脫門。云云。七善修助道。卽是五停心。共念緣念。六番觀禪。謂八念。九想。十想。八背捨。八勝處。十一切處等也。八善知次位者。善識七賢位。不叨濫增上慢。成慚愧有羞僧。內外明照。善識邪正。佛法。非佛法。破諸邪外也。九安忍。強輒兩賊。外則眷屬。惡

名穢稱。若不忍者。則爲所壞。內忍種種證得諸禪。著則生愛。爲輒賊所壞。境界逼迫。是強賊也。十順道法愛不生。發外凡內凡種種順道善法。心不愛著也。是爲要意。云云。末代求聲聞人。知此十法分明。不著文字戲論。內有智性。求於聖道。厭患三界。修五停心。入初賢位。卽是善知佛教。發種種諸禪境。或有增益觸。或有增病觸。或有二十種壞禪觸。或有十種成禪覺。行者因停心故。得欲界定。或得對治。心在靜中。功德法門起。卽便觀之。觀之略爲十。一陰界入境。乃至第十菩薩境。自有行人。或次第。或不次第。或是善是邪。今作十雙料簡。一次第不次第。乃至第十三障四魔。次第者如上。不次第者不如上。別有所出。云云。問。大乘生死卽涅槃。得有理卽。乃至六卽之義。三藏亦得作六卽不。答。欲作亦得。三乘同有偏真之理。是理卽。三藏中習學名相語言。是名字卽。五停心別相總相念處。是觀行卽。四善根。是相似卽。苦忍真明至第九無礙。

道。是分真卽。至佛三十四心斷煩惱及習。是究竟卽。云云。已知三藏要意。須識三人念處不同。先明聲聞別四念處。後說總四念處。別者身受心法也。云何觀身。一切色法名之爲身。內身。外身。內外身。己名內身。眷屬及他名外身。若己若他名內外身。此三種色。皆從前世不淨業生。前世不畏生死。不厭繫縛。不欣解脫。不尚涅槃。於四聖諦。了無願樂。種顛倒業。業縛於識。將入母胎。則有五種不淨。謂生處。種子。相。性。究竟。生處者。女人之體。是不淨聚。蟲膿穢惡。合集成立。筋纏血塗。皮裹其上。如彼土壁。假以泥治。虛莊粉塼。經十月日。二藏間夾。窄隘如獄。釋論云。此身非蓮華。亦不由栴檀。糞穢所長養。但從尿道出。云云。種子不淨者。攬於遺體赤白二滲。於中而住。是識隨母氣息。是爲受身最初種子不淨也。相不淨者。頭等六分。從首至足。純是穢物。譬如死狗。盡海水洗。洗死屍盡。唯餘一塵。一塵亦臭。猶如糞穢。多少俱臭。

從頭至足。皆不淨相也。性不淨者。根本從穢業生。託於穢物。長養其性。自是不可改變。身中有三十六物。內有十二。名性不淨。外有十二。名相不淨。中有十二。通於相性。云云。究竟不淨者。業盡報終。捐棄塚間。如朽敗木。大小不淨盈流於外。體生諸蟲。啞食其肉。狐狼鷄鶩啄裂其外。尚不可眼見耳聞。況鼻嗅耽湏。故毗曇偈云。是身不淨相。真實性常。其始終麤細過患若此。而言淨者。是大顛倒。如狂如醉。如癡小兒捉糞啞嗽。是何可恥。云云。受念處者。領納名受。有內受。外受。內外受。緣內名內受。緣外名外受。緣內外名內外受。又意根受名內受。五根受名外受。六根受名內外受。於一根有順受違受。不違不順受。於順生樂受。於違生苦受。於不違不順。生不苦不樂受。於六根卽有十八受。根塵能所。合三十六受。約三世有百八受。諸受皆苦。樂受是壞苦。苦受是苦苦。不樂不苦受是行苦。諸受麤細無不是苦。如食有毒。食消則苦。樂受壞則

苦。如搔疥初美後苦。樂受壞苦。亦復如是。餘兩苦可知。云云。心念處者。若依麤細。應先法念處。今依說便。明心念處。心者心王。異乎木石。心例上有內心。外心。內外心。心王不住。體性流動。若麤若細。若內若外。皆悉無常。無奢無促。今日雖存。明亦難保。一比丘不保七日。乃至不保一日。佛訶皆懈怠。一比丘言。出息不保入息。佛言。善哉刹那。促時無常。老死至近。是一期無常。佛法欲滅。是轉變無常。山水溜。斷石光。若不及時。後悔無益。云云。法念處者。法名軌則。有善法。惡法。無記法。人皆約法。計我。我能行善。行惡。行無記。若於心王計我。已屬心念處攝。若於心數計我。從九心數。一切善數。惡數。通大地數。並屬行陰法念處攝。此等法中求我。決不可得。龜毛兔角。但有名字。實不可得。若善法是我。惡法應無我。若惡法有我。善法應無我。又惡法是我。何容爲惡自害。若無記是我者。無記不能起業。但名因等起。因此無

記。起善起惡。善惡業尚非我。因等起何得是我。當知
皆無有我。但是行陰。故經云。起唯法起。滅唯法滅。
但是陰法起滅。無人無我眾生壽命。雖有法起。亦是顛
倒。顛倒者。卽是身邊二見。名爲污穢。五陰無記。亦
是污穢。五陰無記。緣報法起。故皆無我也。雖心王心
數。同時俱起。用有強弱。若心強屬心念處。若數強屬
法念處。釋論云。覺觀雖同時。覺時觀不明了。觀時覺
不明了。故分覺觀之異。今心念法念。逐其強弱。亦復
如是。如是善惡等法。求我不可得。故名法念處也。說
別相念處竟。總相念處者。緣一境總爲四觀。此中應四
句料簡。謂境觀俱別。境觀俱總。境別觀總。觀別境總
。初是別觀四念處。後三句是總四念處也。略說如此。
夫一切眾生。生死流轉。皆由顛倒。顛倒縱橫。如猪嗜
糞。肉肥內飽。外油祖父之鎧。云云。斯甚惑矣。似魚
吞鉤。如蛾赴火。以苦捨苦。斯甚惑矣。掣電野馬。水
泡石火。以無常爲常。斯甚惑矣。兔角龜毛。黃門子。

石女兒。無人謂有人。無物謂有物。斯惑甚矣。今以念處智慧破之。知身受心法是知苦。不起倒惑是知集。厭苦息集是修道。苦集寂然是知滅。大經云。我昔與汝等。不見四真諦。是故久流轉。生死大苦海。若能見四諦。卽得斷生死。生有旣已盡。更不受諸有。中論云。能觀身破二十種身見。得須陀洹。觀身是知苦。身見不起是無集。破二十種身見。是有得道。得須陀洹。是證滅。經論孱同。當知念處之慧。有大利益。云云。共念處觀者。大論云。觀身爲首。因緣生道。若有漏。若無漏。受心法念處亦如是。道從因緣生。卽是共義。觀身爲首。共三四十二。卽是有漏生也。共八背八勝十一一切處。卽是共無漏生也。南嶽師云。九想八背諸對治。助開三脫門。故名共念處也。經云。亦當念空法。修心觀不淨。卽此意也。云云。毗曇有門。觀生空。名爲空法。修心不淨。從不壞內外色。以不淨心觀之。名初背捨。若內外色增廣一村。乃至多村。一禽獸乃至一切飛鳥走

獸。悉皆不淨。是名大不淨。若內無色相。以不淨心觀外色。入二背捨。乃至八背捨。八勝。一切處。九次第。師子奮迅。超越欲界初禪。皆不淨。破淨顛倒。以事助道。故名共念處。發真之時。理慧成就。事定具足。三明六通。俱解脫羅漢。堪可結集法藏。破神通外道。有人弘經云。非禪不慧。從五停禪。生四念處。發聞慧也。若非慧不禪者。此從四念處。生四如意足也。私謂此禪又慧共修。證共修念處應便也。緣念處者。大論云。一切色法名身。一入及十入。少分既是色。色屬身也。六受爲受。六識爲心。想行兩陰及無爲法名法。通一切境界皆名緣念處觀。有人言十二因緣境。慈悲皆緣名緣念處。南嶽師云。教所詮一切入界。事理名義。言語音辭。因果體用。觀達無礙。能生四辯。於一切色心無所礙。成無疑解脫羅漢。破韋陀外道。齊此約愛使爲觀意。次破見惑明三種念處者。大論云。真空人亦破一切法。邪見人亦破一切法。云何有異。答。邪見有三種。

一破因不破果。二因果俱破。三破因果又破一切法。瞋處生瞋。愛處生愛。癡處生癡。是爲邪見。真空人破諸法。瞋愛癡處不生。以此爲異。云云。有人破空有兩門。云道非有無。畢竟不可說。今問。空有是斷常者。此則瞋處生瞋。同彼外道。畢竟不可說者。此則亦愛處生愛。過同邪見。又是自然計耳。經言。於諸見不動。而修三十七品。此應作四句。動修不動修。亦動亦不動修。非動非不動修。四句對四門。皆動修。是析法道品四句。皆不動修。是體法道品。若論見者。四句皆見。云何棄兩云是斷常。取一句言是清淨。若論修道品。四句皆得修。云何言一句是修道。兩句非修道。若識四句皆是身邊五陰。身邊五陰卽有集。旣識苦集。卽可修於道品。若不識四句身邊戒取邪疑者。不知苦集。卽是愚癡。與長爪何異。小品云。色若麤若細。若常無常。乃至非常非無常。是見皆依色起。若起我見若麤若細。若常若無常。乃至非常非無常。是見皆依色起。卽是身見。

受心法亦如是。常見有三假。一假有四句。三假十二句。四假則有四十八句。能所合九十六句。受心法。一一皆有九十六句。觀性念既爾。共念緣念亦如是。若阿毗曇人。善識見有中六因四緣。因緣無性。無常生滅。四諦可得道。能破六十二見。若成論見空。善識見空中四緣三假四諦。能破六十二見。見有見空俱得道。即是於諸見不動。而修三十七品。成四枯念處。若不識者。只是有見空見。都未入賢。況於聖位。設極修善。只得人天。若復爲惡。三途是宅。佛法無分。當知四念處觀。邪正分門。若得四念處。一切法正。若不得者。一切法邪。今時行人。不識此意。悲痛奚言。若值眾師。廣聽多論。無能了者。尚不成四枯。豈得四榮。可悲轉深。云云。總四念處者。有人言共念處卽總相念處。今謂不爾。應作四句分別。前已說。今更敘。一境別觀別。二境別而觀總。三境總而觀別。四觀總境亦總。境觀別者。正是別相性念處。次境別觀總。觀別境總。此二是總相

四念處之方便。四境觀俱總。是總相四念處。若作一身念處觀。或總二陰。乃至總五陰。是名境觀俱總也。受心法念處。亦復如是。總相緣念處。總共相念處。亦如是。類之可解。若解前方便者。入總相念處。修總相正勤如意根力覺道。類前可解。總相法深細爲異耳。若安隱入正道中行。能觀四諦生煖法。故大論云。八正道中行。得善有漏五陰。名爲煖法。當知有方便者。卽得三十七品也。問八正七覺。是修道今何得四念處中說耶。答。薩婆多云。八正在前。七覺在後。決定是無漏。若七覺在前。八正在後。通有漏無漏也。此三賢人。並名乾慧地。未證善有漏五陰相似之理。定水未霑名乾。旣有觀行能伏諸見。故名爲慧。住持生善法。名之爲地。故名乾慧地。亦名外凡位。云云。次明支佛觀者。佛者此間名覺。覺有二種。有獨覺。緣覺。俱有大小。小者在人中生。是時無佛。自能得須陀洹。七生又滿。不受八生。自性成道。是人。不名爲佛。亦非羅漢。論其道力。

不如舍利弗。而諸大羅漢。呼此爲小辟支迦羅。大者於二百劫行行。三多倍隆。智慧又強。得三十二相。或三十一相。或三十二十九。乃至一相。於九種羅漢。勝於總相別相。能知能入。久修習空。常樂獨處。是名大辟支迦羅。皆歷三種因緣。十種十二因緣。分別大小。若聞因緣修性念處。觀十二因緣。善根淳熟。因於遠離。自然獨覺。成小迦羅。若修共念處。緣念處。事理善根淳熟。獨覺自悟。具足三明八解六通。成大迦羅。若聞生滅十二因緣。卽發四辯。在聲聞數中。故經云。爲求辟支佛者。說應十二因緣法。法華云。若人有福。曾供養佛。志求勝法。爲說緣覺也。次論十二因緣觀者。初從愛支爲首。一推尋。二觀破。推尋者。是人聞正因緣生滅之法。信解分明。知一切屬愛煩惱。皆是十二因緣。觀之入空。息心達本源。求自然慧。樂獨善寂。修五停心。得諸禪定。於定中知屬愛煩惱。卽是無明。逆順推尋。見十二因緣。推此貪愛因何而生。卽知此貪因受

而生。受因何生。卽知因觸。觸因六入。六入因名色。名色因識。識因行。行因無明。無明因過去一切煩惱。又順推此愛能生取。取生有。有生未來二十五有生死。因生有老。憂悲苦聚。輸迴無際若因停心。入深禪定。如是逆尋。或見歌羅邏初受身。乃至見過去世身。起業煩惱時。乃至二生十生百生。千萬無量世界。順推尋取有。若因禪定之力。或見未來一生。乃至十生百千無量生。若見過去世未來事。其心悲喜。道心精進。轉復增盛。二觀破屬愛十二因緣者。卽是性念處。應別觀十二緣也。性念處如前說。觀愛。卽是污穢五陰性四念處。若觀受觸六入名色。卽是果報無記。五陰性四念處。若觀無明。卽過去污穢煩惱五陰性四念處。若觀於取。卽是污穢煩惱五陰性四念處。若觀於有。卽善不善五陰性四念處。若觀未來生死。卽果報生死無記性四念處。是名逆順觀察。破四顛倒。顛倒滅是無明滅。一切煩惱行乃至老死憂悲苦滅。是名用性念處。應別觀愛煩惱十二緣觀

也。二明破屬見十二緣。又二。一推尋。二觀破。尋者。若見神及世間常無常。亦常亦無常。非常非無常。是則現在生身邊四見。因此身邊四見。生十四難。六十二見。此身邊四見。卽四取。逆順尋此四取因四愛。四愛因四受。四受因四觸。四觸因四入。四入因四名色。四名色因四識。四識因四行。四行因四無明。復順尋四取。四取生四有。四有生一切二十五有生死憂悲苦聚。若深識見惑。過去未來生事。如前說。云云。二明性念處觀。破四取身邊四見。如是次第。乃至無明。破過去如去不如去。亦如去亦不如去。非如去非不如去。身邊二見污穢五陰也。又順觀四取。乃至未來生老死。破有邊無邊。亦有邊亦無邊。非有邊非無邊。身邊二見。污穢五陰。能如是用性念處。破三世身邊二見。四見。卽破十四難。六十二見。一切屬見煩惱。一時皆滅。則無明滅乃至老死滅。屬見煩惱旣滅。卽還用前觀愛十二因緣性念處。觀破欲愛。色無色愛。三界煩惱道業道。名有

餘涅槃。若苦道滅。卽是無餘涅槃。是名性念處智慧。
觀十二因緣入涅槃也。經云。十二因緣。其義甚深。難
解難知。佛說涅槃時。有外道名富那。問。云何令我知
神及世間常。乃至非常非無常。佛答。汝能畢故不造新
。卽能知神及世間常無常。乃至非常非無常。梵志悟解
。求索出家爲佛弟子。又中論明聲聞經入第一義。並約
觀十二因緣。破六十二見。入第一義。若深得此意。不
止破外道。若佛弟子學問坐禪。發種種見取諍論。起煩
惱。作二十五有生死業。皆是屬見煩惱十二因緣。若覺
知者。能用性念處檢校。卽得解脫。其迷此者。流轉生
死。無有邊際。故中論云。眞法及說者。聽眾難得故。
如是則生死。非有邊非無邊。共念處緣念處。觀十二因
緣類前可知。問宿世自然能悟。何須佛說。答。聞說疾
得。不說未悟。譬如果熟。雖自應落。急搖卽墮。問。
支佛何不制果。答。聲聞鈍故制果。支佛利久習智慧。
不須制果。譬如二人共行。身羸須止息處。身強者直到

。故不制果。復次。總相斷結智慧麤故。但除正使。名
聲聞。若別相智慧細。侵習氣。名支佛。復次。聲聞鈍
。先觀苦諦。緣覺利。故先觀集問。聲聞亦別相爲麤。
總相故爲勝。今那得總相故爲麤。別相爲勝。答。若前
四諦中明。別相是麤。今歷別十二因緣。故別爲勝也。
復次。聲聞禪定力淺。天眼但見小千。支佛久植定力深
。天眼過三千。見他方世界。問。支佛乘。何故無方便
道。答。支佛根利。未值佛已悟道。何須前方便入道耶
。問。支佛自悟得道共戒。更須受戒不。答。若發無作
。未必更受。若爾。小羅漢沙彌應不受戒耶。答。受者
和僧耳。今三藏有門。緣覺觀十二緣。破屬愛見。觀門
不具足說之。若行者自善思之。餘三門例可見。三明菩
薩異凡聖。異聖則四弘誓願。異凡行六度行也。二乘斷
煩惱證真。菩薩不斷惑。不入真。故異聖人也。凡夫任
煩惱流。菩薩降煩惱。伏生死作佛事。故與凡夫異也。
於檀中修性念處觀。不與二乘斷煩惱證真同。亦不與凡

夫隨生死流轉同。伏煩惱。住下忍中。修檀。學一切世智。調熟眾生。若人爲貪應墮地獄。菩薩於念處行檀。破貪蔽令脫地獄苦。若眾生破戒應墮地獄。菩薩修尸。令脫地獄。若眾生多怠應墮地獄。菩薩修羸破之。令脫地獄。若眾生亂相應墮地獄。菩薩修禪破之。自行教他。讚歎行者行法等。上四下一。皆如是。菩薩修念處觀。乃至行般若波羅蜜。破一切眾生愛煩惱。貪著果報。作二十五有業。受生死苦果。菩薩修三種念處。破六蔽屬愛二十五有因。卽是拔苦。令修三種念處。卽是道。是名與樂。修性念處。成四波羅蜜。修共念處。成禪波羅蜜。修緣念處。成般若波羅蜜。前四度修性力弱。不成。更修共念處。成破愛也。又修性念處故。爲成大悲拔苦。修共念處。爲成大慈與樂。修緣念處。爲雙成兩誓願也。第二破屬見煩惱。若眾生謂此貪心有無。乃至非有非無。菩薩爾時修念處行檀。破有見中三假。無見

中三假。乃至非有非無中三假。自他共無因四十八句。若有眾生。謂此破戒心有無。乃至非有非無。菩薩修性念處行尸。破有見。乃至非有非無見中三假。眾生謂此瞋心有無。乃至非有非無。菩薩修性念處行忍破之。若眾生謂懈怠心有無。乃至非有非無。菩薩行進破之。若眾生謂亂心有無。乃至非有非無。菩薩修禪破之。有三假。乃至非有非無四十八句破之。若謂癡心有無。乃至非有非無。行般若破之。從有無乃至四十八句破之。無生澆熟。然後三十四心。斷結成道。轉三藏法輪。入涅槃。此應四門。毗曇是有門。成論是空門。毘勒是亦有亦無門。那陀迦梅延是非有非無門。二門不度。大論標名指之。俱舍論破拔和弗多羅部中。明非空非有。正解此義。大論引毗婆沙菩薩品。行因證果。成論無文。若論師破數人見有不得道。言見空得道。若作此語。互是互非。通論兩見。見有只是常見。見無只是斷見。斷常二見。豈不相破。故龍樹云。若不得般若方便。入毗曇

墮有中。若入無墮空中。皆不得道。若不用四悉檀。對緣不同。或用世界入理。故云見有得道也。大論云。色若麤若細。總而觀之。無常無我。卽發真得生空。有門入道也。麤是事觀。細是理觀。但得生不得法者。如經云。當起法想。但有五陰空法。用爲人悉檀。破有顯空。菩薩隨根機有益者。宜聞有門得道。今宜聞空門入道。是故破有明空。故兩菩薩作二論。伸三藏中空有二門。前後雖異得道是同。故云斷見之人。說一念斷。常見之人說異念斷。斷結雖異得道是一。三假入生空五陰空是平等空。爲二聖行。生空是假名空。法空是實法空。是老死誰老死二俱邪見。是聲聞經中說。生法二空相。是老死生空。誰老死是法空。是三藏中辯。四緣三假入空。而有門終是鈍。只得生空。於拙度中空門是利。故得法空。共念處緣念處亦如是。示知大意。細作可解。但無菩薩義。唯明二十七賢聖位。若作四句。此是一周說法。於三藏教中四門。修生滅四聖諦四念處竟。問。

何不先說大乘四念處。答。經中具二義。日照高山。則先大。若初至鹿苑。則先小。今先說小。其意有十。一爲用故。如淨名爲國王長者。說無常苦空等。云云。二爲破故。無砧寧得運槌。如淨名破十弟子。云云。三爲攝故。如淨名室內。說身有苦而不樂於涅槃。云云。四爲會故。如大品會宗。明諸法皆是摩訶衍。云云。五爲開故。如法華決了聲聞法。是諸經之王。大經云。爲諸聲聞開發慧眼。云云。六爲學者。識外邪內曲。不爲邪曲所誤。云云。七爲聲聞人破曲。知其失佛方便。聞末世僻說。知其壞亂半滿。如有人言。毗曇見有得道。成論見空得道。道非有空。見有空那得道。若從此師之說。佛小乘教。有無二門。便是無用。若無用者。中論那云。欲聞聲聞法中。入第一義。如後兩品說。箇師翳佛四枯之教。今爲申之云云。八末世禪人。內證空解。同未括尼犍。破戒行惡。食糞裸形。謂是大乘。同戒取尼犍。壞亂佛法方便道。今雙申之。九爲學者。令識內外孟

浪之說。孟浪之行。精明榮枯法門。云云。十爲令學者。內證之時。懸別邪曲門戶。小大碩異。取捨得宜不謬。持瓦礫謂琉璃珠。爲此十意。須說四枯觀也。私記者。襍錄聲聞念處。苦諦爲首。緣覺集諦爲首。菩薩道諦爲首。通菩薩滅諦爲首。別菩薩界外道諦爲首。圓菩薩界外滅諦爲首。又聲聞總相觀。緣覺別相觀。菩薩總別雙觀。通別界內外次第觀。圓界內外圓觀。又聲聞因成假觀爲首。緣覺相續假爲首。菩薩相待假爲首。問。道品六度。何者爲正。答。大經云。一地至十地。名智慧莊嚴。六度波羅蜜。名福德莊嚴。法華明五品。一念隨喜爲正。兼行六度爲助道。淨名。道品善知識。六度爲等侶。凡三經。皆以六度爲助道。大論云。三十七品爲正道。三解脫助開門。乃至不淨助破貪。勝處助緣中不自在。十一切處助緣中不廣普。無量心助福德。並助開門法。問。道品是有漏是無漏。答。大論對位。各有差降。或有漏無漏。云云。成論明念處不退。數人明煖法退。

爲闡提。頂退爲五逆。成論明念處伏惑。成假名空。數人但是聞慧。今明若通說從初至後。皆是道品。逐勝分品節級受名。云云。大論云。初從師受。前用念持名念處。四種精進名正勤。四種定生名如意足。五善根生名五根。五煩惱破名五力。分別道用名七覺。安隱道中行名八正道。此乃勝者受名。皆通念處位。只是有漏耳。故論云。八正道中行。初得善有漏。五陰名爲煖法。若不許四念處通至八道。亦不得八道通四念處。故婆娑云。若八正在七覺前。決定是無漏。若八正在七覺後。亦有漏亦無漏。此通修語耳。若八正是見道位判在前。七覺在後。是證得位。云云。

四念處卷第一

音釋

搗
手吁爲切
指爲魔切
也

銜
銜熒絹切
賣絹切
也

杌
木五忽切
無枝切
也

塿
白時闌切
土闌切
也

滌

與丁
滴歷
同切

啞
與子
啞荅
同切

鴉
與處
鴉脂
同切

孱
連鋤
一山
切鋤

羸
切楚
限

四念處卷第二

隋天台山修禪寺智者大師說

門人章安灌頂記

分章爲三大意。停心念處大意者。前性。共緣。只見生滅之理。發真斷結。乃至極果。猶是四枯拙度。今無生四聖諦。卽事而真。麤細等觀。皆如幻化。四榮巧度。大經云。聲聞有苦。有苦諦。菩薩解苦無苦。而有真諦。○大品云。欲得聲聞。欲得緣覺。欲得菩薩。皆當學般若。故名通教四念處也。通義有八。謂理。教。智。斷。○行。位。因。果。理通者。同緣卽色是空故。教通者。同稟無生之說故。智通者。諸法不生。般若生故。斷通者。須陀洹若斷。同是無生法忍故。行通者。同乘摩訶衍乘故。位通者。同是乾慧地。乃至佛地故。因通者。同學般若波羅蜜故。果通者。同到薩婆若故。三人八義不殊。故名通也。復次。通有三義。一因果皆通。二因通果不通。三通別通圓。因果俱通者。如上八通說。

近通徧真四枯拙度。因通果不通者。乃是別果來接通因。得見佛性。成四榮雙樹。通別通圓者。別圓因果。皆與通異。藉通開導。得入別圓。因成非枯非榮雙樹之果也。若通因果。正是小大半滿分門。亦是析體拙巧。聲聞藏菩薩藏。羊鹿異路。何者。三藏未斷惑。猶是凡夫。住下忍位。伏見思惑。以誓願乘五通。住生死化眾生。二乘斷正使。拙度保涅槃。不能前進。故從此分門。若三人同以無言說道斷煩惱者。是滿字摩訶衍門。多所含容。卽開爲三。一通。二別。三圓。體諸法如幻化。不生不滅。不斷而斷。三人通位。從乾慧性地。爲伏道見地。至七地斷正盡。緣覺根利。能侵習。位齊八地。若菩薩斷正盡。畱習扶誓。受生死化眾生。八地九地斷塵沙無知。學道種智。此卽通教。通三乘人意也。若通別者。初因通門得入十住。斷界內惑盡。十行斷界外塵沙。學道種智。十迴向學中道。十地破無明。見佛性。是爲通於別意也。通圓意者。初因通門入十信。斷界內

惑。任運自盡。登住見佛性。斷無明。十行十迴向。並斷別惑。此通圓意也。故知大乘斷伏。永異小乘。如習應中。有菩薩從初發心。與薩婆若相應。是聲聞一切智。通通教意。若菩薩從初發心。遊戲神通淨佛國土。成就眾生者。通別意也。若從初發心。卽坐道場。轉法輪。度眾生。是菩薩爲如佛。通圓意故。大論舉三人。諭謂步馬神通。馬雖勝步。不及神通。一念卽至。譬圓教力大不妨餘也。又大論明燈炷云。乾慧爲初炎。佛地爲後炎。此卽通家名乾慧非斷道。而爲初炎者。乃是論主申含容。引外人作此解。乃以相似燈炷爲初炎耳。若言二地是菩薩斷道者。此取性地爲斷道。至六地與羅漢齊。或取八人地是斷道。此以三地爲斷道。七地齊羅漢。而今不取二地三地。乃取乾慧者。故知是通三人之初。以似道爲初炎耳。復有人言。歡喜爲初炎。佛地爲後炎。此約別教斷道爲初炎。別家初地見常住理。斷無明。見中道。故名歡喜是初炎。復有人言。初住爲初炎。佛

地爲後炎。是圓教意。初住見中性。圓斷一品無明。故初住爲初炎。此是通教通別通圓之義。通教四門者。大論云。一切實一切不實。一切亦實亦不實。一切非實非不實。爲向道人說。聞卽得悟。皆名第一義悉檀。云云。中論觀法品。又作四句。證諸法實相。三人共得。卽其例也。若幻化有門。則通五人四門。門門有五人。是則二十人。三藏雖四多用有門。通多用空門。別多用亦空亦有門。圓多用非空非有門。天親雖說別圓。多明別階級。龍樹雖明幻化影像。十論諭之。有不離無。無不失有。非有非無不思議之理教也。問。若爾。三藏亦有三人同入。何不名通。通亦有三人之殊。何不名別。答。三藏三人。一人不入。故不名通。通雖三人。而皆入但空。不得稱別。云云。問。通是滿字門。而稱通者。何故。停灰斷耶。答。譬如朱雀臺門。雖通貴庶。有停私室者。有至府省者。有見天顏者。如前所釋。通通。通別。通圓。此義可知。又譬如因心有眠有夢。夢諭於

空。眠諭於假。心諭於中。聲聞觀四諦無生。如幻如化。
。以入空。緣覺觀十二緣無生。如幻化以入空。菩薩觀
六度無生。如幻化以入空。不深見假中。故同住灰斷。
若能尋夢得眠。尋眠得心。非但見空。亦見不空。亦見
非空非不空。釋大意竟。二五停心者。名數同前。云何
有異。魚目明珠。質同理別。曲直體析。巧拙料簡。已
如前。大經明果報五陰。色受想行識。亦是一法。凡夫
爲苦爲惱。二乘緣不淨無常出生死。菩薩觀陰卽是於真
。更無別理。如薄福者。覩金成蛇。爲之所害。福人見
寶。得而用之。苦諦旣然。三諦亦爾。眾生不知沒在於
苦。造二十五有。輪環宛轉。無解脫期。菩薩爲此而起
大悲。發弘誓願。拔苦與樂。雖發誓願。所度如度虛空
。雖誓斷如空共鬪。雖安如空種樹。雖滅實無得度。觀
一切無所有。無所有故空。空故不生。不生故不滅。畢
竟清淨。行者雖作此觀。其心浮逸。如犬逐塊。若欲攝
散。睡眠昏熟。如鼃得暖。當知不修停心。心不得住。

雖作此解。是直作善。如有眼無足。不得入池。若善用
四悉檀修五停心者。卽得住觀。如密室無風。照物得了
。當知阿那波那。三世佛入道初門。又云。亦爲甘露門
。光明云。卽開甘露門入處食等。云云。旣信解已。當
修五停。謂阿那波那等。云云。覺觀多者。當觀入息不
生。出息不滅。不生不滅。息卽是空。無能觀所觀。皆
不可得。不可得卽真。真卽心停也。多貪欲者。當觀貪
欲非垢。無貪欲非淨。非垢故不生。非淨故不滅。不生
不滅故卽空。空卽真。真故心停。多瞋恚者。當觀於慈
。慈恚卽不生亦不滅。不生不滅。卽是空。空卽真。真
故心停。又觀罵者是誰。誰受罵者。何等是罵。罵者與
諸佛等。受罵者與畢竟空等。罵法與薩婆若等。打者受
打者。打法亦如是。一一音聲不能見罵。眾多音聲亦不
能罵。唯當自責。過去煩惱多。今世瞋恚盛。若不能忍
。心則螫毒。生死無畔。應當息之令停也。著我多者。
當觀其身如屠牛四分。但見四大六種五陰十二入十八界

。何處有我。卽破我見。五愚癡者。對因緣觀。三世因緣破斷常。二世破果報我。一世破性我。善用五法治心。心則安住。得觀無生。無生現前。卽破煩惱。有直有善名爲初賢。大論云。觀行是智慧性。何故言三昧。答。若不定心中修此。是顛倒智慧。如前說。狂愚之人。豈是賢聖善直之意也。作是修時。種種諸境發。一陰界入境。乃至菩薩境。善當識別。去取得宜。無生正觀破之。一一皆是摩訶衍故。乃至二十種壞禪覺。十種成禪覺。皆須識知。故大經云。迦羅迦果有九分。鎮頭迦果纔有一分。城中人不識。食之卽死。行者若明十法卽鎮頭迦。十法者。一善識無生正因緣境。如空無相無方維上下。心性亦爾。二真正發心。三止觀修習。四破愛見諸法徧。五善識通塞。愛見中苦集爲塞。滅道爲通。六用三十七品調適。七修助道。開三脫門。八善識次位。九安忍。十順道法愛不生。此十法成乘。卽入菩薩位。得三乘道。云云。問。何等煩惱障定慧。答。有人言愛

生煩惱障慧。散動無知障定。復有人言。百八煩惱障定。性得繩障慧。今不爾。但隨偏多爲障也。問。通家若爲明六卽。答。無生理卽。幻化名字卽。乾慧地觀行卽。性地相似卽。八人已上爲分眞卽。佛地爲究竟卽。云云。三明四念處者。念是無生觀慧。處是所觀境。先明屬愛煩惱者。小品云。卽色是空。非色滅空。色性自空。空卽是色。色卽是空。觀空無色。觀色無空。能觀智境。並不生不滅。智卽是境。境卽是智。非智滅境。智性自境。卽生無生。故名無生。非謂無有生名無生。觀內身。外身。內外身。一切色法若麤若細皆如幻化。卽是約身修性念處。受心法皆是苦性。苦性卽空。皆如幻化。若作共念處者。亦當念空法。修心。觀不淨背捨勝處一切處。皆卽空。是爲共意。緣念處者。緣佛無生。方等十二部經。乃至知眾生根性卽空。云云。云何修身性念處。色若麤若細。總而觀之。如夢如幻響化。此色緣不淨。如我此身歌羅邏時。父母二滴爲緣。業煩惱爲

因。因緣和合。生此報身。九孔常流膿囊涕唾。三十六
物性相種子。究竟不淨。貪愛計淨。是顛倒見。若見不
淨。卽破淨倒。中論。劫初穀子不生。世間現見故。劫
初穀不滅。世間現見故。因緣合集名爲生。因緣散名爲
滅。散故不常。集故不斷。是名世間不常不斷。此文正
表內種子。十二因緣和合。不生不滅也。問。若種子生
。卽從自生。若從遺體生。卽是他性生。自種子遺體合
。卽是共生。若非種非遺卽無因生。若從種子生。何用
遺體。若從和合。復屬何緣。若無父母之他。云何得種
子之自。無自故從誰生。汝種子能自生。未有父母之他
。無種子之自。若已有種子之自。卽不從他也。問。汝
過去業。與六識心俱不。若其事滅。業附心識來於現在
。難。六識生滅。業亦生滅。不爲自生。若滅。不應附
心來。若不依阿梨耶識。義不成也。若從父母生。是從
他生。汝自性尚不能生。云何從他生。難。猶有自性故
。卽有他性能生。若無自性。父母爲誰作他。若自他共

能生者。汝於自他若能生。共可能生。俱既不能。和合亦不生。若能生卽有兩過。自既不生。他亦不生。卽兩不能生。兩法相助成生。爲是自。爲是他。如兩砂無油。合亦無油。若自他不能生。合時亦不能。若合能生者。並亦應兩砂無油。合時應有油。若兩合無油。當知自他本不能生。合亦不能生。如一盲不見。二盲亦不見。若謂非種子非父母生。從無因生。難。無因得果。果復應無。如無泥而能生餅者。亦應從木生等。是無因故。從因緣生尚不可。況無因耶。是則因果倒亂。罪人獲福。云云。壞世間法。若無世諦。卽無出世。是大邪見人。若四句責生不可得。是則無生。無生而生。是名假生。假生非生。但有名字。是字不生。亦不生。是字無所有故。自他共無因。畢竟不見身。生處不可得。若無生處。亦無滅處。生滅不生滅。非生滅非生滅。清淨平等。正觀觀身細色。如隣虛塵。卽有十方分。若有十方分。卽具四微所成色香味觸。色爲自。香味爲他。卽

因成假義。若從色生。卽是自性。若從香味生。卽是從他性生。合是共生。離色離香味是無因生。四句檢之。生不可得。是故說無生。無生而說生。是名假生。是名細色無生。如論云。若有極微色。是則四微所成。又云。若有極微色。卽有十方分。則不名極微。四微成色。此卽因成假觀。此假因成。如夢幻。細色麤色無生是苦聖諦。思益云。菩薩知苦無生。名苦聖諦。此色身四句因成中檢無生。名身念處。問。此色爲從滅生。爲從不滅生。爲從滅不滅生。離滅不滅生。若從不滅生。是自滅生。若從滅生。則從他生。若從滅不滅生。是共生。離生則無因生。論云。不自。不他。不共。不無因。四句生皆不可得。是故說無生。無生而說生。是名假生。色不淨破淨倒。又問。此色爲待色。待無色。乃至共離皆不可得。是則無生。無生而說生。是則假生。是皆不淨破淨倒。是性身念處。以智慧性。觀屬愛身色生相。得慧解脫須陀洹。乃至慧解脫阿羅漢。若作是觀時。未能

得道。於中生著。是愚癡法。名無染。若染於法。乃至涅槃。是則染著。隨情三種念處。如前三藏中說。若隨理三種念處。卽如通中說。隨情是事相。隨理是無生。念處乃至心法亦如是。共念處者。行人觀念處。修八背捨事中諸禪。乃至熏修等。如明眼開倉見穀粟。種種不淨不同。大論明骨想。卽解十力四無所畏。十八不共法等。乃至燒想。諸論師疑文誤。何意從骨想。卽解十力無所畏耶。今師云。人不得論意。此中爲修共念處。又不壞骨人成俱解脫。三明六通八解。悉皆具足。受心法亦如是。爲成摩訶衍故。非論誤也。緣念處者。緣佛十部經。四辯說法。悉皆無礙。教化眾生。心緣普徧也。四念處四種精進。名四正勤。四種定。名四如意足。五善生名爲根。破煩惱名爲力。分別道用名七覺。安隱道中行名八正道。次破屬見煩惱。觀身如幻化。非垢非淨。若起見謂淨不淨。亦淨亦不淨。非淨非不淨。是事實餘妄語。是見皆依色。若謂此淨等。過去如去。不如

去。亦如去。亦不如去。非如去非不如去。未來有邊。無邊。亦有邊亦無邊。非有邊非無邊。卽陰離陰十四難。約三世五陰六十二身見。是污穢無記。五陰卽具三假。淨法塵對意根生意識者。爲意生。爲塵生。爲合生。爲離生。若意生是自生。乃至離生是無因。卽破因成假。若意根滅生不滅生。亦滅亦不滅生。非滅非不滅生。皆墮四句。則破相續假。若待無有識生。若待有有識生。若待亦有亦無識生。若待非有非無而識生。皆墮四句。則破相待假。所破能破。例十二。是破有見中十四難。六十二見不淨。無見中亦三假十二句能破。亦例十二句。亦淨亦不淨。亦有亦無見。三假十二句破。能觀亦十二句例破。非淨非不淨。非有非無見。亦十二句破。能觀亦十二句破。用性念處觀之。破身念處九十六句。破生見不可得。成無生身性念處。次觀受念處。破生見。經云。受受。受不受。受亦受亦不受。受非受非不受。又云。行亦不受。云何受受。不行亦不受。云何受不受。

。行不行亦不受。云何受亦受亦不受。非行非不行亦不受。云何受非受非不受。受受故是有見。是見依受起。受亦受亦不受故。是亦受不受故。是無見。是見依受起。受非受非不受故。是非有非無見。是見依受起。是事實餘妄語。過去如去不如去。乃至非如去非不如去。未來有邊無邊。乃至非有邊非無邊。卽陰離陰爲十四難。約三世有六十。卽陰離陰合成六十二。有見中三假能所二十四。破生見。無見中三假能所亦二十四。無生見。亦有亦無見中。三假能所二十四句。亦生亦無生。非有非無見中。三假能所二十四句。破非生非無生。合成九十六句。破生見。成無生受性四念處。次觀心性四念處。觀心常無常。乃至非常非無常。是見依識起。過去如去乃至非如去非不如去。未來有邊無邊。乃至非有邊非無邊。卽離爲十四難。約三世爲六十。卽離爲六十二見。常見中。三假能所二十四句。無常見中。三假二十四句。亦常亦無常見中。三假能所

二十四句。非常非無常見中。三假能所二十四句。九十
六句破生見成無生也。法性四念處。觀有我無我。亦有
我亦無我。非有我非無我。是見皆依法起。過去四見未
來四見。卽難爲上四難。約三世五陰爲六十二。有見中
三假能所。破有二十四句。破後例爾。九十六句。破我
見。是名四念處。乃至八正道。是破屬見中三十七品。
故經言我斷一切諸見纏等。以智慧刀。割斷破裂也。若
共念處觀九想八背等。一切禪。亦名得解觀。非實觀也
。三十七品。例前。受心法亦如是。緣念處觀見中有一
切佛法。無生四諦。教理。名字句義。通達無壅。隨眾
生根性。樂欲。便宜。對治。第一義。而爲說法。是爲
破屬見。煩惱中。修三種別相四念處觀。問。何意通教
明非苦非樂。是三十七品例前受心法。亦如是。苦果非
苦非樂應是樂。答。此作四句。若通論非苦非樂。此意
通四句不可說。有因緣故。說非苦非樂。結成生滅苦樂
。是三藏意。若非苦非樂。結成無苦無樂之苦樂。屬通

教攝也。淨名云。迦旃延五義。五受陰通達空無所起。是苦義。結受念處。如大品不淨觀。即是摩訶衍。皆不可得故。以是不淨心觀色。自念我身未脫是法。未免三界生。猶應受百千生死。故言未脫。引廣乘品。成身念處。觀諸法不生不滅。是無常義。結成心念處。觀於我無我而不二。是無我義。結成法念處。觀。若作非常非無常。成常。非垢非淨。結成淨。非苦非樂。結成樂。非我非無我。結成我。即成別教義。常樂我淨。斷惑歷別來證也。若作非垢非淨。雙照垢淨。非苦非樂。雙照苦樂。非常非無常。雙照常無常。非我非無我。雙照我無我。結成圓教。圓心修習。不斷煩惱。而入涅槃也。於乾慧地中修總相三種四念處。如前三藏中分別。但有如幻如化體法即空之異耳。是為無生。總相四念處。但是總相念處。修身即空。陰入界一切法亦如是。是名身念處。受心法亦如是。觀此位是總相念處。修四正勤。如意根力覺道三十七品。共緣念處亦如是。雖未發煖相似無

漏法水。而總相觀五陰智慧深利。勝別相念處。是故名
總相念處。屬乾慧地外凡也。辟支迦羅名目。大小如前
。亦修三種念處。十二因緣。過去無明。只是不淨煩惱
五陰諸行。只是善惡五陰。從識乃至受。是果報無記五
陰。愛取。煩惱五陰。有。是善惡五陰。未來生死。是
果報無記五陰。若麤若細。總而觀之。如幻如化。是名
性念處。因緣覺也。共緣念處。例前。亦有性共緣三種
觀。三人大小也。菩薩發菩提心。慈悲誓願。觀此身受
心法三種念處。修性身時。觀此身色若無生。如幻如化
。能發煖頂等法。成五停心。別總四念處。名伏忍。四
善根名柔順忍。發真斷結八人地。名無生忍。須陀洹名
無生法忍果。斯陀含名遊戲神通。阿那含名離欲清淨。
阿羅漢名已辦地。八名辟支佛地。九地名菩薩地。十地
名佛地。性念處觀。成破界內見思通惑。得一切智與羅
漢齊。八地修界內道種智。破界內塵沙無知。是共念處
。九地已上。學一切種智。是緣念處。十地當知為如佛

。佛是通教佛。成就四枯。莊嚴雙樹。故云四念處。坐道場。斷通惑正習。盡見偏真之理。於二諦中。觀照純熟。是名坐道場。般涅槃者。卽有餘無餘二種涅槃。轉法輪者。轉通教無生偏真之法輪。令一切眾生同入偏真法性。非中道不空法性。故法華云。我等同入法性。不見佛性。二乘俱得此理。並有坐道場轉法輪。而羅漢不斷習氣。只是四枯莊嚴。支佛小深侵習。亦是四枯。菩薩不斷習。以誓願力熏行。處處受生。調熟眾生。學一切智。道種智。一切種智。是名通教佛。只是四枯莊嚴雙樹。但三藏是拙度。觀門旣拙。解空亦淺。如迦旃延五義。是通教體假入空。觀門旣深。三藏是事觀爲疎。通教理觀爲密。三藏附事爲僞。通教緣理爲真。比至證得真時。無復爲別異也。

四念處卷第二

音

釋

驪

馬鄰

深知

黑切

色

鼉

切唐

魚何

名

四念處卷第三

隋天台山修禪寺智者大師說

門人章安灌頂記

開章爲三。一大意。二五停。三念處。大意者。四句雖略。網羅罄盡。若絕若說。若世出世。已如上辯。今依不生而生而明別也。中論名假名。卽此句也。別家四門。且指大經云。佛性如閻室餅盆。井中七寶。有門也。眾生佛性猶如虛空畢竟清淨。無門也。譬如乳中。亦有酪性。亦無酪性。亦有亦無門也。佛性非空非有。第四門也。雖列四門。若說若行。多用亦有亦無門也。問。有門可明佛性。空門云何有性。復濫通家。答。別教是不但空。所以得見佛性。通家但空局。不但空廣。廣局云何相濫。眾經諸門列位。位數增減。華嚴初無十信。後無等覺。於十住中多明圓義。於登地中多明別義。若住若地。皆說界外行位。不語界內。云云。方等前分對緣散說得道而已。未論地位。至瓔珞總結階級。明五十二

地。前後數整。界內亦分明。諸般若前分。亦對緣散說。亦未有階次。勝天王但明十地。前無三十心。後無等覺。新金光明無前無後。但明十地。仁王般若明五十一位。無等覺。推諸經意。如軍師蕩寇竟。方敘勳勞。定其爵祿。所以前散後結。問。法華是後經。那不明位。答。前明一部之前後法華是一期之後。良以瓔珞結諸方等。仁王結般若竟。法華在後。不明次位。但決了諸權。而入於實。涅槃亦不明次位。同開佛性。入祕密藏。但地義深微。非聖證不了。凡下莫知。對緣增減。隨機廣略。出沒宜爾。但順佛語。依修多羅。不得執此訶彼。各興諍競。非法毀人。誣佛謗典。云云。南嶽師釋大品。三處明位。初四十二字門。初阿後荼皆具一切法。判屬圓教四十二位也。次明初地修治地業。乃至第十修治地業。判屬別教位。後明乾慧地。乃至佛地。判屬通教位。此深得經意。文義朗然。然佛一期諸大經。門門不同。位位數異。行人採用各異。若論數整。須依瓔珞

。若扶三觀次第。須依大品。若凡夫得預。須依涅槃。數整可解。扶三觀者。欲以道慧。具足道種慧。當學般若。欲以道種慧。具足一切智。當學般若。欲以一切種智。斷煩惱及習。當學般若。初五方便。伏見思。從假入空觀。十住是道慧。斷見思。從空入假。學道種慧。斷塵沙。若從假入空。破偏假。從空入假。破偏空。至十迴向中。學不假不空。一切智。伏無明。登地得一切種智。若至等覺。一時斷煩惱及習。若不明等覺。只十地斷煩惱習也。是以三觀相扶。云云。若瓔珞明十信十住為習種性。十行為道種性。十迴向為性種性。十地聖種性。等覺性。妙覺性。略則七位。廣說五十二位也。依涅槃五行十功。五味半滿。次第相扶。始自凡夫。得預修學。具有別圓。界內界外。四四諦意。菩薩住堪忍地。鐵輪位中。修生滅四諦。十住中修無生四諦。十行中修無量四諦。十迴向中修相似。無作四諦。登地見中得一切種智。五

行十功。問。藏通云何得入涅槃中修學耶。答。涅槃扶
律而說。故名贖命。若別圓有法身慧命。何須贖命。贖
命意在藏通灰斷之命。令得法身常住也。問。三藏生滅
慧。云何贖成常住慧。答。今涅槃引藏通中。昔日灰斷
。不明佛性。今俱引見佛性。當知三慧被決不同。先曰
。若論戒。則五支諸戒。小乘所無也。若論定。從八背
捨十信中伏通惑。住堪忍地。教化眾生。豈同二乘。問。
何以得知。答。一以義推可見。二以聲聞相異。問。別
教登地。猶用界內通名。名四依義。何意不用界內方便
耶。答。卽得用旣以通名。名斷道。何意不得用方便伏
道煖等位耶。又復佛法名教通用。小乘名教。在方便中
尚用。大乘方便道。見諦斷道。何意不用耶。所言別教
。其義有八。謂理。教。智。斷。行。位。因。果。云
云。理別者。三諦之理。理隔不融。信而修之。從淺至
深。歷別有異。從淺與後別。深與前別。當體間隔。是
名理別。教別者。佛日先照菩薩。二乘聾瘡。豈況凡夫

。瓔珞仁王地論攝論。不明界內。故凡聖異聞。大論明
一與聲聞共說。二不共說。不共說卽教別也。大經五行
不融。小品三慧屬三人。釋論釋之。實是一法。爲向人
說。令易解故。三慧爲三如。一時說三相。此卽教別也
。智別者。圓意難顯。要假方便然後可見。如因作入無
作。因無常以入常。外人難。因無常果云何常。佛答。
汝因是常。而果無常。何故不聽我法中因無常而果是常
。云云。別菩薩欲學常住佛性。先修無量四聖諦。後觀
諸法實相中道佛性。不生不滅。不垢不淨。次第梯蹬。
先觀空。次學恆沙佛法。後開如來藏。次第修三眼三智
。是名智別。斷惑別者。如無量義云。眾生欲性無量。
欲性無量。說法無量。說法無量故。藥病無量。藥病無
量故。通塞無量。分別校計生滅無生滅無量。無作苦集
滅道皆無量。覆如來藏。藏闇故造作二十五有業。受諸
生死。愍此長夜。發菩提心。興四宏誓。自脫無量繫縛
。亦脫眾生無量繫縛。是名斷惑別。行位因果等別可知

也。問。無作既勝。何不緣無作發菩提心。答。別家以無作是果。果不通因。故非發心正意。意者緣無量發心。至果方成無作耳。問。若爾初地已得無作。何意不緣發心耶。答。初地分得。妙覺時乃究竟。例如三藏初生滅。果方無生。通則不爾。發心即觀無生。別人初緣無量。後乃無作。圓人發心。初則無作。大意竟。云云。二停心者。前三藏數息不淨等停心。疎遠事偽。通以觀息不生不滅停心。即事而理近密真。今別教以持戒之根本。若我住世無異此也。即佛。依此而住即僧。雖爾。望於三藏。是密是真。望於實相。非近。非密。非真。非理。與前別後別。居季孟之間。此義可知。云云。大經云。菩薩作是思惟。出家間曠。猶若虛空。一切善法因之增長。在家逼迫。猶如牢獄。一切惡法因之而生。往詣僧坊。聞佛有無上道。無上正法。大眾正行。即求出家。佛是非果之果人也。無上道是慧聖行。正法是定聖行。大眾是戒聖行。此是非因之因也。菩薩受持時。如

乘浮囊。度於大海。爾時愛見羅刹。來乞浮囊。若全若半。若手若指。若塵。令汝安隱。得入涅槃。謂稱情暢樂名涅槃。鈍使造惡。多墮三塗。利使執見破戒。亦墮三塗。或執見修善。多牽天上。久後還墮。若不隨愛見。能生五支諸戒。一根本業。清淨戒。謂四重也。二前後眷屬。餘清淨戒。前後是方便。偷蘭遮等。餘是諸四篇等也。非諸惡覺。覺清淨戒。定共戒也。護持正念。念清淨戒。道共戒也。迴向菩提。大乘戒也。後有九種。與釋論十種相似。一清淨戒。謂受得清淨也。二善法戒。謂動不動皆毗尼也。若護持不犯。生止行兩善。謂法也。三不缺戒。謂五篇不破也。四不析戒。析假入空。體假入空。皆道共戒也。五大乘戒。即菩薩初信心。經云。汝等但發菩提心。則出家禁戒具足也。六不退戒。即十住不退也。七隨順戒。對十行隨道戒也。八究竟戒。九迴向戒。斷界內正習也。十具足諸波羅蜜戒者。登初地乃至等覺也。於一戒中。具足爾許法門。即是別

家停心。如前數息身命之要。今戒爲法本道之根源。故以戒爲停心也。菩薩雖信佛法常住之理。內解分明。猶自覺觀不住。是直而非善。爾時更學定聖行停心。卽共念處也。依經卽是隨息停心。此知阿那出息入息。繩長知長。繩短知短。元治覺觀。發根本淨。特勝通明等淨。如開倉見穀粟。經云。復有梵行。謂見身中三十六物。是修念處實觀也。次不淨觀。治貪欲。經云。復有聖行。謂除却皮肉。諦觀白骨。一一節間。有我不耶。作此觀時。卽見骨中青黃赤鴿色。是背捨欲界定相。四色轉明。心與色青合。故一切皆青。餘亦爾。是未到地相。爾時不壞內色。不壞外色。內外俱不減色相。以是不淨心。觀內外色。卽見額上骨中。八色光明。煜煜而出。照天下。卽初禪覺支相。聲聞但有光不見佛。菩薩多修念佛。見佛或爲說法。卽初背捨初禪攝。內無色相。以是不淨心觀外色者。內減卻骨人。以不淨心觀外色。外色有二。一身外之色。卽是死屍等。二骨人所放八色。

光明。是界外之色。所以須觀者。去欲界近用以防過故。界內色外色。皆不淨。故言以不淨心觀外色。若作修家方便。自有觀法滅卻骨人。今但言證法。見骨人自然消磨不見。但有八色及外不淨。故言內無色。外觀色。此骨人滅時。卽有未到地相。亦是初禪謝。二禪內淨起。起時八色一陪更明。青黃赤鴿。非復前比。亦有內淨喜樂。一心四支。不同根本特勝通明中。是爲二背捨二禪攝也。云云。三淨背捨身作證時。是三禪相。舊云三禪無勝處。四禪無背捨。釋論明淨背捨身作證。三禪偏身樂得爲證。四禪無樂。何所爲身作證。成論。人以三禪共爲一淨背捨。今用三四兩禪。從容共爲一淨背捨。無嫌三禪身證。爲淨背初門。成就在第四禪。第四禪具足勝處也。何故言淨。大論云。緣淨故淨。八色是淨法。未被練不得淨。今三禪四禪法起。來觸此八色爲作淨緣。三四禪等。此是色界極淨之色。用此爲緣。故言緣淨。觸八色更淨。故言緣淨。是樂徧身受故。知是三禪

中淨。有四義。三如前兩背捨卽是緣淨故淨此意也。四空四背捨。無色更無別法。但以空無相心修。若凡夫人自地地愛染。聖人深智慧利。直去不迴。故名背捨。問。舊云此無別法。但以無漏修。此可然。前何意無別法。不可指舊禪爲別法。不可指邪禪鬼定外道事爲別法。云云。今次四禪得修。若不得禪。作觀不成。設修。雖不發無漏。亦名修背捨。而不名解脫。若有宿習發此何嫌。但滅受一背捨。不得無漏。修則不成。故不論發宿習也。九次第師子超越等。三藏中無有凡夫修得此定。大乘或有。云云。次大不淨。亦名大背捨。良以假想厭力小。若假想厭背大。皆由緣處廣狹。若觀骨人不淨。除卻皮肉。或觀一屍。一兩城邑聚落等。所有正報。故言小不淨。小背捨。若大不淨。結是依報國土錢財穀帛山川林園。江河池沼大地。一切色法。悉皆不淨。蟲膿流出。臭腥流潰。山如聚膿。河海穢濁。衣服如臭屍皮。飲食皆蟲汁。大經云。觀好美羹作穢汁想。飯如蟲

聚。宅如塚墓。大地無可愛處。若幻術誑人。今神通得法道理。故酥蠟金鐵。遇暖則流。遇冷水結。凡夫遇淨緣成淨。遇不淨緣便不淨。達此道理。得其轉變。良以昔曾修得。今發宿習。故大地依正。悉是不淨。初學乍有興廢。數習成性。任運不淨。譬如鑽火。發不擇薪。乃至江河乾竭。此觀亦爾。初止一屍二屍。一兩聚落。若成大勢。一切依正。無非不淨。故言大不淨觀也。又福人感色淨。又人心著淨重。於穢輕。破此大著。皆爲不淨。不可定執山河國土而言爲淨。如僧護見地獄一百二十五所。所見大地是身。爲他所耕。叫喚苦惱。是名田地獄。又見身是樹。眾苦競集。宛轉呼咤。若山若屋。衣裳浴室。房法事等。悉皆受苦。何者。昔觸境生著起愛。今觸境穢惡受苦。今爲轉此愛染。修大不淨觀。但破淨顛倒。亦名大不淨。大背捨。若凡夫所修八禪。但除下地。不能除自地。佛弟子所修能除下地。亦除自地。未是無漏。不能除上地。若無漏緣通。則自地下上皆

能除也。若內觀骨人。外觀色。名初背捨。初禪攝。若內無色。外觀色外八色正依皆不淨時。名二背捨。二禪攝。此兩背。約依正判大小。若三禪入淨背捨。則不論。何者。根本是小。所得不淨成小背捨。若根本是大。成大背捨。乃至四空滅。受。例如此。云云。若約兩不淨爲勝處。還依依正判大小。若約多少好醜。成小勝處。亦約依正多少好醜。成大勝處。所以厭背心未能轉變自在。勝處更來熟之。一屍少。二屍多。十少百多。一國少。大千多。衣食多少亦爾。初未能多少。少習旣成。卽能多。今發還爾。若好若醜者。此約兩報爲好醜。端陋慧愚富貧貴賤。而論好醜。好醜皆不淨。此亦小不淨耳。大則好山惡山好國惡國好醜皆不淨。此則大也。次依正俱醜。骨人所放八色爲好。此兩俱不淨者。而名好醜。此爲勝處初禪攝。若內無色。外觀色若多若少。若好若醜。勝知勝見二禪攝。雖無骨人而外有八色。復有依正若多若少好醜如前。云云。勝知勝見者。了此心

於色不爲色所縛。心能轉色。故言勝知勝見。淨不淨等。皆於己心能得自在。觀解成就故。言勝知勝見。行者如此觀勝之時。豈更貪世。己身尚不惜。何容貪他。上古賢隱推位讓國。還牛洗耳。皆昔經成此。今於五欲。無復染意。若不得此心。貪之至死。後四勝處。在四禪中。三禪味樂。多不能轉變於聲聞法。如此菩薩。豈無勝處耶。大論云。青黃赤白。瓔珞云。地水火風。此亦無在。四色是名。地水是其體。此中但多少轉變無好醜。何以故。内外色盡故。但八色流光。故無好醜。四勝處在第四禪中。十一切處亦在四禪中。初禪覺觀多。二禪喜動。三禪樂動。不得廣一切處。唯此不動念慧。則能一切處。以一青徧十方皆青。餘色亦如是。若一切入者。將一青色入一黃色。徧一切處。一黃入青。亦徧一切處。而青黃不失。餘色相入亦如是。爲一切入。此是內心所放八色徧一切處。那言取少樹葉爲緣。徧一切處。若內心無此力。外不能徧。不應取外色爲緣也。大論

取優鉢羅華者。爲人不解。借外諭內。不可以諭爲是。亦有此義。若通明觀中無骨人。不放八色。是時修八解脫。借外爲緣可爾。今不壞法人有八色。自不用之。取外樹葉。此不成義。今不用。云云。次明菩薩修緣念處。於依正中。轉變自在。具諸波羅蜜。慳心旣破。尚不惜身。何得爲身貪求他物。是名檀。得是觀時。終不爲此依正。偷殺妄語。危他自安。順理行心。名尸。若彼觸己。終不生瞋。發言動身口加報。是名忍辱。終不倚此不淨生身。懈怠耽著。恣情以自穢襪。是名精進。善巧方便。四隨得所。所觀調適。念慧現前。或不淨。背捨勝處。神通變化。願智熏修。結是諸禪。於中轉變。得成三昧。百千變化。一切道。一切定。皆在此禪而得具足。是名爲禪。作此觀時。身受心法。非因非果。非世出世。若苦集滅道。悉皆不淨。能觀所觀。一切諸法皆不可得。無所有故。畢竟清淨。無一可得。不生不滅。名般若波羅蜜。是名於勝處中轉變。爲一切法門。是

心定故。隨意自在。隨作隨成。勝處之觀。如好馬能破前陣。復能調制其馬。欲去欲住。迴轉自在。作諸法門。亦復如是。不可窮盡。是名菩薩於四念處修勝處觀。觀中廣修諸法。悉於勝處修習。若發宿世善根時。亦於勝處中發。是時觀淨。無魔入壞此法。何以故。心得自在。無障礙故。作於心師。心使於魔。魔不能破心也。行四三昧人。多轉入五種佛子之位。或卽入五品弟子之位。何故爾。並是助道力大。大助開門。入清涼池。劑此是觀禪發相也。若九次第定師子超越等。有二位。依三藏阿那含人。得無漏。心地調柔。方能修九定。凡人修不得。大乘人修習者。如發心二不別。別教菩薩。歷別修習。但不取證也。若案經前有持戒對數息。次有不淨觀。一一節間求我不得。卽對界方便。光中見佛。卽是念佛停心。劑此是性念處。對四停心也。次修緣念處觀。學四無量心。修法緣慈定。分明開發。觀法無我。不可得故。是界方便觀四無量心者。通論慈悲。始終皆有。

無緣。卽以實相爲慈。慈卽如來。慈卽解脫。慈卽法身。此乃實相之理。無緣之慈。不修眾生法緣之慈。不修眾生法緣事慈。正修無緣大慈。事慈自發。應須識知。所言事慈者。卽眾生緣慈。發有兩義。一發此慈熏定。定法轉深。因此慈定卽發根本。二者或先得欲界。或得未到地。或得根本。於根本中有慈。亦言發此慈。一切眾生得樂之相。無怨無惱。歡喜稱心適意。或得人中樂。或得天中樂。若修得慈定分明。想其得樂。無一眾生而不得樂。此名慈心定。但此定緣眾生有三種。若緣親人得樂名爲廣。緣中人得樂名爲大。緣怨人得樂與親人等名無量。又緣一方眾生得樂名爲廣。緣四維名爲大。緣十方名無量。此定有兩。一隱沒。二不隱沒。若緣眾生得樂。心中明淨。決定所緣之處。實不見此眾生得受於樂。但想而已。是爲內不隱沒而外隱沒。自有內心明淨。作得樂想。而外所緣十方眾生。分明見其得樂。或得人中。或得天中。其相分明。是名內外不隱沒。若慈

定中。見三種人得此樂相後。始復發根本五支。五支功德。倍勝根本。如砂糖石蜜和水。豈方單冷。悲喜捨附定起亦如是。菩薩修此禪定。內思力強。故住堪忍地。在十信位中。靡所不作。故迦葉問菩薩有緣得破戒不。答。有緣亦得。如仙豫殺五百。施甘露鼓十劫之壽。乃至爲眾生地獄。云云。次性共念處。合修生滅四諦調心。探觀無生四諦。助伏見惑。至斷見時。還用無生四諦斷故。大經云。苦是逼迫相。集是能生相。滅是寂滅相。道是大乘相。如三藏中要須禪助伏見惑。暖法方得發。今亦如此。菩薩知此惑障深重。不可卽斷。借生滅方便。發十住暖法也。問十住十信中。退不。答。經明六心退。七心不退。問。別教只用此戒。與聲聞異不。答。雖同而異。菩薩戒具足五支。及究竟諸波羅蜜。二乘不能究竟。或身智俱亡。入無餘灰斷。問禪復若爲。答。聲聞法中。斷欲界方得修初禪。菩薩不爾。於十信修共念處觀。學背捨。安忍成就。爲眾生修一切護持正法。

。畏於二乘道。如惜命者。二乘豈能如此。菩薩修十信
初心。卽具十行。經云。十法爲道。一信有十。十信有
百。乃至十地。只是十法。但一受不失勝者受名耳。四
念處亦如此。只是觀解轉深。名轉勝。卽是別家乾慧地
。初賢位。問。此十信與圓十信云何。答。圓伏無明。
見思自盡。六根清淨。皆能互用。故言若干種。一時皆
悉知。身如淨明鏡。能現諸色像。唯獨自明了。餘人所
不見。問。別與通十觀若爲。答。通用十法傳傳簡別。
若三藏十法。止破外道。成三乘人。外人不知暖法人所
行處。況有十法。通教十法異三藏。三藏後心。亦不知
通家初心。通家初心。亦不知別教初心。況後心耶。別
教十法異者。一善識正因緣。無明佛性之境。通教但識
無生真諦。幻化境耳。二真正發真正無量四聖諦心。求
常住佛果。能度法界眾生。通家只發心緣無生四真。令
得有餘涅槃。度界內眾生。三止觀調適者。止成一切禪
。觀成一切種智。通家但通三乘共止觀。願智頂禪耳。

四破法徧者。破界內界外法。次第徧。通家止破界內二諦徧耳。五善識通塞者。如來藏顯爲通。取相塵沙遮障爲塞。通家只約四諦見愛中論通塞耳。六三十七道品調適者。大經云。修無量三十七品。是大涅槃因。通家但是偏真小涅槃因耳。七善修助道者。修十波羅蜜。一切萬行。恆沙佛法。開三脫門。通家但開四諦。助三脫門耳。八善識五十二地七位。廣略皆知。通家只三乘共十位耳。九安忍強輒兩賊者。忍法界眾生。二十五有有空強輒。通家只忍愛見爲強輒耳。十順道法愛不生者。於大涅槃不生貪著。況小涅槃。通家守果愛小涅槃。是生死貪著故。如此分別十法大異。又具十番觀門。入十信成堪忍地上菩薩位。亦可以十法對十信。菩薩修三種念處。發諸境界種種諸法。或真或僞。或益或損。不出於十。十者謂陰。界。入煩惱。病患。業相。魔。禪。見。慢。二乘菩薩等。今不委釋。如彼具明。若不頂墮。得入初賢位。問。別教六卽如何。答。中道佛性爲理卽

。解五十二地文義。通暢無礙。名字卽。十信爲觀行卽。三十心爲相似卽。登地至等覺爲分眞卽。妙覺爲究竟卽也。第三念處觀者。遠緣如來藏理。其理難明。而假方便眞實得開。至如三藏通教用世間方法。世間行人。五種七種以爲方便。別教以出世方法。出世行人三十心等。以爲方便。譬如鑽火。暖在前出。亦如入海。先見平相。法華以無漏爲涅槃相。當知析假是三藏方便。體假是無生方便。析體無量是別方便。方便性念處。顯眞實性念處。方便共念處。顯眞實共念處。方便共念處。顯眞實共念處。方便共念處。生滅無生減無量。皆是別家方便。方便若成可稱火相平相。方便不成。無暖無平。大海難得。其觀云何。初以五停心遮煩惱風。善直成就慧燈。照了陰身不淨。五種穢惡。受有百八。悉皆是苦。介爾違順。念念無常。善中無我。惡中亦無我。非善非惡何處有我。別相總相。循環宛轉。寂入涅槃。此觀成時。開五停。成十信。亦名外凡。

亦名乾慧地。亦名善有漏五陰。能伏界內淨等四顛倒。帖然不動。聲聞厭苦。欲速涅槃。菩薩不爾。捨生滅四諦觀。正修無生四諦觀。觀苦本不生。不生故不滅。不生故不有。不滅故不無。不常不斷。畢竟清淨。淨若虛空。尚無有苦。云何顛倒。受想行識亦復如是。是觀成時。進入十住。入理解心。名爲內凡。亦名暖法。亦名亦有漏亦無漏。約界內名。亦無漏。約界外名亦有漏。故名似解。十行十迴向。似解亦漏無漏。登地乃名無漏。正用無生四諦慧。斷界內見思故。大經云。菩薩解苦無苦。而有於真。三諦亦如是。故云。入理般若名爲住。有二種般若。若發中道是圓般若。若發空是偏般若。於界內爲真。於界外爲假。亦名一品相似中道。論其所斷。斷界內通惑盡。與通七地齊。亦得界外相似慧眼。故須菩提云。我從昔來所得慧眼。未曾得聞如是經典。卽此義也。又斷界外上品塵沙。又伏無明。猶是暖法。內凡也。地人以五佛子謂四果支佛。開五爲十。對十住

。今不爾。大論云。先於五佛子果人中歎。今何故獨歎
菩薩。答。聲聞諸菩薩未得果。大乘菩薩得果故。獨歎
菩薩。今不用前五佛子對十住。若欲作者。取法華五品
弟子。開五品爲十。對十信故。仁王云。十善菩薩發大
心。長別三界苦輪海。十善卽十信。十信尚斷惑。況十
住耶。云云。若欲前進。應捨無生四諦。正修無量四諦
。無明與法性合。起無量取相。感無量生死。無量塵沙
。招無量果報。無量無明。受無量報身。則有色受想行
識。皆是苦諦。無量受陰所有煩惱。皆是集諦。無量能
觀之智。皆是道諦。無量集盡苦除。皆是滅諦。如是無
量根性。無量藥。無量授藥法。無量方便。菩薩爲此而
起大悲。發四弘誓。未度界內外五陰。乃至餘有一生在
者。皆令得度。未解通別見思四諦塵沙無明者。皆令得
解。未安偏道者。並令得安。未入小涅槃者。皆令得入
。常樂我淨。四德具足。修是觀時。進入十行。從理進
趣。方修一切眾行。故名爲行。亦名登頂。斷界外中品

塵沙。得界外相似法眼。見恆沙佛法。相似如來藏。云云。若進入十迴向者。應捨無量四諦。正觀無作四諦。云何觀。初從有門觀佛性。但無明重。故不見。小品云。諸法如是有。如是無。所以是事不知。名曰無明。無明覆心。不見佛性。四門俱塞。巧用四隨。四門俱開。門雖有四。只是不二法門也。觀此無明。爲從無明生。爲從法性生。瓔珞及地論皆解云。從法性生。攝論云。從無明生。依阿黎耶識起。此識是無記。如地有金土。依染如土。依淨如金。故言依他也。黎耶識依業生。故言依他也。若他依者。六識所起善惡業。六識謝滅。種子依黎耶攝持得生。故名他依。彼論偈言。此識無始時。一切所依止。三藏學士述難小乘人云。汝六識中起善惡業。六識謝過。善惡亦應隨滅。若滅。現不得起。若不滅。無黎耶依何攝持。今還難之。汝偈道他依。汝那道依黎耶。黎耶是無明客法。爲他法性是本法。爲自。若法性爲自。黎耶成他。但依他。何處有自。若他等是客

法。喚六識爲他。何意不得喚黎耶爲他。又難。六識依黎耶。六識爲他。黎耶依法性。黎耶亦是他。云云。若黎耶他是自性。自性應是他。如此定時隨彼意。答。若自若他。俱被破耳。問。一切善惡。從無明生。法性生。無明法性共生。爲離無明法性生。法性生是自生。無明生是他性生。無明法性合故生。是共性生。離無明離法性生者。是無因生。諸法不自生。亦不從他生。不共。不無因。是故說無生。無生說生。假生非生。但有名字。是字不住。亦不住。是字無所有故。無明爲自。法性爲他者。亦作此破。云云。師云。雖四句不立。而人多執共生。譬如眠法。與眠心合卽生眠。眠故有無量夢事起。云云。無明與法性合。生無量六道事。六道事皆從無量煩惱生。又生無量不思議塵沙煩惱。起無量界外事。菩薩修四念處。尋此無量煩惱無量事相。依無明起。若得無明。卽得法性。得法性故見佛性。若通教。只尋六識如幻如化卽空之觀。但斷枝條。不尋根本無明。

不見如來藏。以不見故。不得無明。不得法性。不得無明不得法性故。不見佛性。如尋夢得眠。不得眠心。良由六識中觀淺。但是化城止息。不能深觀如來藏恆沙佛法。菩薩深觀如來藏。破無量取相。破無量塵沙。破無量無明。破無量身相。破無量受相。無量心相。無量法相。識無量病相。知無量藥。作此觀時。卽入十迴向。迴因向果。迴事向理。迴己濟他。故名迴向。此位正是解行終心。麤惑已融。似中慧淨。斷界外下品塵沙。伏無明轉強。如向山趣前漸易。見相似中道。見恆沙佛法。斷恆沙煩惱。入相似是自行。出界假是化他地持解自性禪。是三十心位。未至初地。大經明初依之人。具煩惱性。能知如來祕密之藏。未得第二第三住處。正是三十心位。又地持明三十心爲三分。一觀分。二止分。三二分同類。正是地前方便道中。修三種念處。觀分是修性念處。止分是修共念處。二分同類。是修緣念處也。相似中道觀。於一剎那頃。眞解開發。登於初地。斷一

品無明。得一分無作四諦解。五行成就。諸功德滿。若通對位。一一位中。各有三種念處。若別對者。十住修性念處觀。十行修共念處觀。十迴向迴別向圓。修緣念處觀。至初地三種念處分成就。若對大品。欲以道慧當學般若。對十住性念處位。欲以道慧具足道種慧對十行共念處位。欲以道種慧。具足一切智。對十迴向緣念處位。欲以一切智具足一切種智。對十地位。一往如此。若登地中道顯時。真性法身分成就一切禪。一切禪有三。一現法樂禪。二出生三昧禪。三利益眾生禪。登初地時。名味皆轉。觀分轉名現法樂禪。能生十力種性。三摩跋提破無明。法身顯現佛性。一法界一切法界。一切法界一法界。非一非一切。三諦自在。能百佛世界作佛。諸佛加之。能為十地菩薩說法。菩薩不諦。謂是真極。法華中佛加聲聞為菩薩說法。諸佛子等。從我聞法。佛為授記。汝於來世當得作佛。諸聲聞尚爾。況加諸菩薩等。色心神通相好。光天動地。形聲兩益。法眼開朗。

。知眾生根。有機卽應。善巧分別。猶如虛空。不可窮
盡。聞說法者。皆得道果。此是觀分。亦是觀身內法。
性理顯。名性念處力也。止分轉名出生三昧禪。出生百
八三昧。普現色身。名三昧王。一切三昧。悉入其中。
住首楞嚴。修治於心。猶如虛空。能一法門一切法門。
一切法門一法門。非一非一切。無礙自在。破無明顯真
我性。十波羅蜜諸陀羅尼門。如來藏海理內之事。皆悉
明顯。若化眾生假作名字。說種種五陰。破種種顛倒。
說種種法藥。破種種病。作無量醫王。應病與藥。令得
服行。皆令悟入菩薩正位。是名檀波羅蜜。以施眾生。
故經言。有法門名無盡燈。卽此意也。下九波羅蜜例爾
。彼解十波羅蜜。對十地初檀滿。但是約位耳。直於禪
中修。具百波羅蜜。觀法界神通徧照法界一切眾生。眾
生蒙光。罪垢煩惱皆悉除滅。是名止分。亦是共念處力
。云云。二分同類。以修緣念處觀。得法界緣起。以無
緣慈悲。修身赴機。得如來一身爲無量身。無量身爲一

身。非一非無量。自在能現十法界像。處處應現往。只同是一五陰。用有強弱。界內力弱。只見偏真。界外力強。能見圓滿。今時三種念處。具足三德。性念處顯爲法身。共念處顯名摩訶般若。緣念處顯名解脫。所調伏眾生之處名爲解脫。復次。亦以性念處爲般若。共念處爲解脫。緣念處爲法身。法身卽法性。見法性卽見佛性。卽得中道。得中道卽得菩提。得菩提卽住大涅槃。卽得諸佛法界。法界卽法身。法身遍法界用故。住大涅槃。種種示現。三種念處。名三點。不縱不橫。爲大涅槃。得色解脫。受想行識五種涅槃。具二十德。名四念處。坐道場轉法輪。若圓爲雙樹。非偏非圓。中間入涅槃。諸行功德莊嚴。名常樂我淨。是稱歎新醫從遠方來。曉八種術。遠方者。從法身地。起慈悲誓願。應眾生。眾生根緣不同。是以現種種身。說種種法。法華云。長者驚入火宅。爲度眾生。生老病死憂悲苦惱。愚蔽三毒之火。教化令得三菩提。云云。登初地時。得二十五三

昧。凡十番破二十五有。破二十五空。破二十五無明。得無畏地。不畏三惡四趣有邊。不畏聲聞緣覺空邊。不畏大眾威德。二邊中間皆不畏。以修性念處故。云云。得自在。若至地獄。不受熾然碎身等苦。至一切處無一切苦。能以須彌入芥子。芥子含須彌。毛孔注滿四海。海內一毛孔。以修共念處力。云云。得二十五三昧。一切三昧悉入其中。一切事。一切理。皆無所畏。皆自在。皆名王三昧。以本修緣念處故。初地既如此。從二地乃至妙覺。可以意知。不俟更說。當知四念處有如此大功德力。何況後諸法門耶。有眼有意者。自當耽味。何俟囑耶。

四念處卷第三

音釋

澄

切 丁
梯 鄧
也

烜

烜 余
光 六
盛 切
也 烜

潰

散 胡
也 對
切

劑

分 才
劑 詣
也 切

四念處卷第四

隋天台山修禪寺智者大師說

門人章安灌頂記

第四圓教四念處者。爲三。一大意。二停心。三念處。大意開四門。云云。若說若行。多用非有非無門。云云。餘法易知。別圓須解。一明位有高下。二明法之偏圓。三明斷不斷。四明具不具。五明通不通。位高下者。別教十信伏界內見思。十住斷界內見思。又斷界外上品塵沙。十行斷中品塵沙。十迴向斷下品塵沙。伏無明。登初地。見中道。斷無明。乃至等覺妙覺斷無明盡。圓教初有五品弟子。名外凡。十信名內凡。皆圓伏無明。而界內見思。自然而盡。如火燒鐵。鐵雖未融。垢在前去。正慧觀無明。無明未除。見思前盡。若登初住。斷一品無明。乃至十住斷十品無明。與別家十地齊。若登初行。又斷一品無明。與別家等覺齊。若至二行。與別家妙覺齊。若登三行。所有智斷。別人不識其名。況知

其法。四行乃至十行。十迴向。十地。等覺。妙覺。所
有智斷。皆非境界。但知十二品斷無明。爲己家之極果
。不知是他家之下因。譬如構塼石爲基。以金寶飾上。
豈如從基至頂。悉累金剛。非唯高低有殊。亦寶非寶別
。法說譬說。簡別朗然。不須惑矣。二法偏圓者。類如
小乘斷通惑。不除別惑。聞甄迦羅彈琴。迦葉起舞。天
冠問曰。耆年解脫。何故如此。迦葉答言。聲聞之惑。
我已斷盡。此是菩薩勝妙功德。故吾於此不能自安。如
四方風不動須彌。毗嵐風至。碎如腐草。當知聲聞斷通
。不能知別。無漏力弱。不能自安。別教初心。止伏見
思。地前止斷界內見思。登地分分伏無明。分分斷無明
。此則偏斷。非圓伏也。若作界外別說者。登地斷別見
。二地至六地斷別欲界思。七地斷別色無色界思。此亦
偏斷之義耳。又作不思議六塵義者。入無量禪。作無記
變化色。住復入力禪。捨復入力禪。起復入力禪。無量
百千億劫。倒修凡夫事。至八地已上。猶是無色界果報

。不可思議六塵。何以得知地持解等覺無垢地。始得離見。見清淨禪。當知離欲界色無色惑。俱至等覺乃盡。方是圓義。若八地始離無色界果報者。是偏斷之義也。故大經云。十地爲無我輪惑所轉。無我只是見惑。若見惑先斷。不應至無垢地。若見至無垢地者。乃圓義耳。以是推之。偏斷則是別意也。圓斷惑者。始外內凡。卽圓伏三界之惑。初住卽圓斷無明。二住至等覺。皆圓斷無明。以此推之。圓別斷則明矣。三斷不斷者。別但明斷。不論不斷。圓具二義。若教道明斷。證道不斷。例如小乘。方便論斷。證真不論斷不斷。今亦如是。若不思議觀。內不見有煩惱可斷。煩惱性不障菩提。菩提不障煩惱。煩惱卽菩提。菩提卽煩惱。故淨名云。佛爲增上慢人。說斷婬怒癡。名爲解脫。無增上慢者。婬怒癡性。卽是解脫。無行經云。婬怒卽是道。又云。六十二見。爲如來種。卽六根六塵而無限礙。只眼中見色。亦眼中入三解脫門。華嚴明十眼乃至六根。皆明於一塵中。

。具十方三世諸佛。八相成道。轉法輪。度眾生。皆不
斷而明了也。四具不具者。若只作一法。不作一切法者
。此是別意。若一法一切法趣一切。是趣不過。趣尚不
可得。況有趣非趣。趣一卽法性。法性卽法界。無一法
出法界外。若有一法過涅槃者。我亦說如幻如化。故知
一法具一切法。卽圓意也。五諸功德通不通者。若別意
只一地不關餘地。若圓意一地一切諸地。故大品云。若
聞阿字門。卽解一切義。過茶無字可說。初阿具足四十
一字。後茶亦具四十一字。從初地具有住持生長荷負義
。至後究竟。亦具三義。大論云。有始入。中入。終入
。實是一入。而有初中後。問。若作圓意。若爲判不思
議二諦。答。偏圓俱通。是世諦相。非通非塞。是真諦
相。大意竟。二五停心者。私謂五品是也。卽事而理。
其相自彰。何者。初教以數息事停散動。圓家以信理除
疑惑。又信是道元。故當初品。又信是功德母。如彼氣
命。又信順不動。卽是停心。故信品。是一停心也。初

教以不淨事觀。停貪欲。圓家以讀誦除穢染。若著文字染污法性。是爲染法。非求法也。文字性離。卽是解脫。解脫清淨。是第二停心也。初教以慈停瞋。圓以慈故有說。說無祕悞。悞有祕恚。則非慈相。當知慈故能說。第三品停心也。初教以因緣觀。停癡圓以六度。度於六蔽。闇去明生。是第四品停心也。初教以念佛。停逼迫。圓以卽事而理。理卽法佛。法佛豈逼迫。佛法。無能逼所逼。無逼無逼者。無逼法。是第五停心。當知信事卽理。文字卽解脫。慈卽寬宏。度蔽彼岸。一切平等。是圓家五停心也。以五品爲停心。其義已顯。更重舉四宏。四三昧。生死苦諦。卽是涅槃。無二無別。此則信事順理。道元功德母。未度苦諦。是初停心。煩惱卽菩提。無二無別。是爲未解集諦。令解集諦。卽第二讀誦解脫停心也。大悲拔苦兩誓願。云云。未安道諦。令安道諦。卽是以無悞之慈而說法。第三停心也。未入滅諦。令入滅諦。卽是兼行六度。度蔽彼岸。第四停心也。

。大慈興兩誓願。云云。又指四三昧。爲第五停心也。此四三昧。皆修念佛破障道罪。自有人數息覺觀不休。若念佛若稱佛名。卽破覺觀。帖然心定。故普門品云。若有眾生多於貪欲。常念觀音卽便得離。破根本無明。淨名云。一念知一切法。是爲坐道場。皆是念佛法門也。常行。出般舟。諸佛倚立現前。觀法界佛也。常坐。出文殊問般若。繫緣法界。一念念法界而念佛也。半行半坐。出方等。法華。如是作已。卻坐思惟諸佛實法。法華云。當成就四法。一爲諸佛護念。云云。此語初心行人。久行道者。如安樂行。常好坐禪。在於閑處。修攝其心。觀心無心。法不住法。我心自空。罪福無主。作是懺悔。名大懺悔。云云。非行非坐通四法。一通眾經。二通諸善。三通諸惡。如賢者軍戎家業等。不妨用心。四通無記。行住坐臥語默。皆是摩訶衍。以不可得故。夫達者懸解。迷者未悟。如囊中有寶。不探示人。人無見者。今更點對。冀得超然。前三藏中。以事緣事。謂

數息不淨。乃至念相好等。今則不爾。以理觀緣理。生死卽涅槃。煩惱卽菩提。生死是眾生之息命。涅槃是法身之息命。雖不可數而可散動。明寂對於數息也。煩惱是底下之穢惡。菩提是尊極之淨理。對前顯後。故以文字解脫。對不淨停心也。大悲誓願。拔因果苦。若有我所。尚不自出。況拔他苦。若無我所。以慈悲心。自拔他。對前顯後。云云。大慈誓願與因果樂者。若十二因緣癡。尚無自樂。況與他樂。今自無癡。故能與樂耳。對前。云云。行四三昧。皆是念佛破障道罪。前教念生身應相好。今念法身相好。事理永殊大異。故舉四三昧。爲第五停心也。次修十觀成五停者。五停上求。上求何等。一信順不思議一實四諦是也。信一念具十法界。生死卽苦諦。一心具十法界。煩惱卽集諦。集諦卽菩提。菩提是道諦也。生死苦諦卽涅槃。是滅諦也。此四非四。此一非一。而名實諦。煩惱徧一切處。一切處皆是菩提。棄此菩提。更何處求菩提。如此生死苦諦。徧

一切處。皆是涅槃。棄此涅槃。更何處求涅槃。畢定停
心。於此煩惱上求菩提。畢定停心。於此生死上求涅槃
。信卽是求。非別求也。是名信一實諦。成於停心也。
又云。何停心。停心欲下化。須發真正心。眾生不知生
死卽涅槃。未度苦諦。菩薩爲此而起大悲。誓令得解脫
。旣得脫已卽是令度苦諦。眾生未知煩惱卽菩提。菩薩
爲此而起大悲。令得解脫。旣得脫已。卽是令度集諦。
眾生若解煩惱卽是菩提。卽是安於道諦。眾生若解生死
卽是涅槃。卽是而得滅諦。是爲菩薩下化眾生。言真正
者。無行經云。若發心求菩提。是人去佛遠。譬如天與
地。蓋指發三方便菩提心也。此乃菩提心魔。大經云。
自此前。我等皆名邪見人也。若人爲說此法。名善知
識魔。經言涅槃爲生死者。指貪著界外涅槃。成變易生
死也。經言生死卽涅槃者。指分段生死卽大涅槃。況復
變易而非涅槃。以真正菩提心真正化也。將此下化。以
成停心。初名上求。次名下化。乘何等法。向上向下。

所謂善修止觀。生死卽涅槃。涅槃名止也。止心心性。名爲大定。大涅槃深禪定窟。故涅槃卽是止也。觀煩惱卽是菩提卽觀也。實相之慧。名一切種智。一切種智名爲般若。法華曰。定慧力莊嚴。卽上求。以此度眾生。卽是下化。當知止觀。是所乘之法。專此止觀。成於停心。既能乘向上向下。向上應得果。向下應得度。既不果不度者。何物妨礙。而今不獲。當知破法不徧。當研生死卽涅槃。橫破十法界鯁塞。煩惱卽菩提。豎破十法界鯁塞。菩提涅槃道卽通也。不卽六法那忽卽六法。是故須破不離六法那忽離六法。是故須破。不卽不離。菩提道通。以此破法。成於停心。云云。旣破法徧。應與理會。那猶不合。當更細檢。一切諸法中。皆有安樂性。那忽併破。一切諸法皆魔羅網。那忽併取。須明識通塞。若迷生死非涅槃。十法界皆塞。迷煩惱非菩提。十法界亦塞。達生死卽涅槃。十法界寂滅。名之爲通。煩惱卽菩提。十法界癡如虛空不可盡。老死如虛空不可盡。

窮無明無。見始見終。名之爲通。如此善知識不思議險道。通塞之相。以成停心。云云。旣識通塞。云何於坦道中。修於道品。若生死身不淨。乃至心無常。此析法四枯道品。涅槃卽生死指此意也。若初修不淨。後修於淨。乃至初修無常。後修於常。此卽四榮道品。生死成涅槃。此之謂也。若卽不淨。卽修非淨非不淨。乃至卽無常。修非常非無常。此是非枯非榮。於其中間。入般涅槃。此之謂也。故經言。從初發心。常觀涅槃行道。具百句解脫。名百斤金。煩惱卽菩提。名首楞嚴三昧。修治於心猶如虛空。亦名王三昧。是名善修道品。以成停心也。旣善修道品。自能流入三解脫門。未入而難起。方救他而難起。皆何對治。若慳蔽難起。觀慳卽菩提。受不受。亦受亦不受。乃至五不受。檀卽法界。檀義攝於六資生無畏法。是中一二三。慳卽菩提。不取不捨。餘蔽亦如是。又對治轉治不轉。兼非等。云云。是名助道。成於停心。云云。行人未得謂得。未證謂證。增

上慢起。當如之何。觀生死卽涅槃。煩惱卽菩提。理涅槃也。能如此解與修多羅合。文字涅槃也。所觀如文。文如觀。觀行涅槃也。六根清淨。相似涅槃也。無明破。佛性理顯。分真涅槃也。等諸佛。同大覺。究竟涅槃也。當自觀察是何等位。撫臆論心。莫自欺欺他。是名識次位。助成停心也。行人行道。欲熟未熟。多動內外障難。每須安忍。令內外障不能動搖。能忍成道事。不動亦不退。是心薩埵。外謂毀譽八風。內謂強軟兩賊。分生死不能羅。煩惱不能染。十法界見愛。皆爲侍者。分段變易。二死寂然。以安侍者。侍者以供給役運。是名安忍。以成停心也。順道法愛不生者。夫將登而崩。將過而墮。此非小事。大有所失。行者慎之。莫起法愛。故云涅槃卽生死。涅槃貪著故。生死卽涅槃。無退不生。故。於十法界法。一無所染。名順愛不生。而生般若。般若者。如人有眼。能避險從平。何須傍教。是名十觀成。五停心。一一停心。皆須十觀。總有五十觀。云云。初

品觀十法界眾生卽是佛。十法界五陰卽是法。眾生與佛無二無別。眾生陰。佛陰。無毫芥之殊。三世佛事。眾生四儀。無不具足諸波羅蜜。是名爲僧。大論云。眾生無上佛是。法無上涅槃是。又至名僧者第一義是。信順隨喜而無疑惑。是名初隨喜品。將此心讀誦。名第二品。能少分說。名第三品。兼行六度。名第四品。具足六度。造立僧坊。四事如理。乃至般若。名第五品。五品成熟。名觀行位。一品旣須十觀四品亦如是。十觀成五品。如上說。以想慧純熟轉爲十信心。初隨喜一實之理。無二無別轉成信心。信慧分別。罔罔無滯。於此信中心。具一切佛法。如金剛寶藏。無所缺減故。二真正發心。度下崇上。轉成念慧真正。故經云。百生千生。千萬億生。令心正念。以正念故。如來善護念。又如七覺中心沈。以念起之。破生死卽涅槃。若心散時。以念觀攝之。令煩惱卽菩提。是爲真正發念也。三善修止觀。轉成精進心者。經言。一心勤精進。故得三菩提。一切眾

行。精進爲本。正觀明白。純無間雜爲精。不染愛見爲進。云云。四破法徧轉。成定心。涅槃卽生死。菩提卽煩惱。是大散亂。今觀十界生死卽涅槃。達一切法解脫相。究竟常寂滅相。終歸於空。體常寂滅。是名橫破生死。轉成定心。起染愛煩惱。煩惱卽菩提。是豎破十法界無礙。徹至法性。轉成定心也。五善知通塞。轉成慧心。若起十界愚癡。名爲生死。若起十界貪瞋。名爲煩惱。觀生死卽涅槃。煩惱卽菩提。菩提非一非三。是名慧心也。六善修三十七品。轉成不退心。若四枯道品。雖不退入分段。而不進變易。猶名爲退。今四枯道品。又非榮非枯道品。出到不生不生彼岸。故名不退心也。七修對治助道。轉成迴向心。迴生死向涅槃。迴煩惱向菩提。迴因向果。迴事入理。故言迴向心也。八善識位次。轉成護心。若叨上濫下。起增上慢。卽是菩薩旃陀羅。今不執生死作涅槃。不執煩惱作菩提。又三業於涅槃無染。於菩提無著。是名護心也。九安忍內外強軟。

轉成戒心。菩薩戒具防形心。若起二乘心。是破戒。知諸法不生。無心無念。不倚不著。名不破戒。大集云。寧捨身命。不求小乘。名持戒心也。十順道法愛不生。轉成願心者。菩薩發願求大涅槃。不取不證。小品云。願求菩提。不以小爲足。足卽住。以不足故涅槃不應住。用此十心。成一住。十住有百。名百法明門。十行十向十地。展轉增倍。千法明門。萬法明門。千萬百萬。不可說不可說明門。故瓔珞云。十信爲諸道大勝者受名。名住行向地耳。若復前推十信。是內凡相似之位。名柔順忍。亦名伏忍。界內煩惱圓融。無明圓伏。得六根清淨。云何淨。眼中取相淨。塵沙無明淨。乃至意根亦三種淨。故不障三身三德。三身三德。皆與真相似。相似故名六根清淨。廣說如法華。云何六根互清淨。大品云。眼中眼不可得。眼中耳不可得。乃至眼中鼻舌身意。皆不可得。是爲六根互清淨。又眼中眼相不可得。眼中耳相不可得。乃至鼻舌身意相皆不可得。是爲六根

相互清淨。眼中眼性不可得。眼中耳性不可得。乃至鼻
舌身意性皆不可得。是爲六根性互清淨。若名不可得。
是俗清淨。相不可得。是真清淨。性不可得。是中清淨。
。又名相性皆不可得。是俗清淨。不可得亦不可得。是
真清淨。非俗非真不可得。是中清淨。但以眼爲本。互
淨諸根。耳鼻舌身意各各爲本。各各互淨諸根。互淨如
上說。云何六根互用。於眼根中。能見無量百千萬億。
不可說不可說。不可思議不可思議。虛空等世界中。十
法界眾生色。若依若正。若內若外。若上若下。悉見悉
知。是爲眼根用。卽於眼中。聞無量百千萬億。不可說
不可說。不可思議不可思議。虛空等世界中。十法界眾
生。若依若正。兩種音聲。地獄燒煮聲。大論云。考掠
聲。象馬車牛楚毒聲。餓鬼求食聲。修羅鬪諍高大聲。
無數種人聲。苦受等三受聲。乃至有頂入禪出禪聲。大
論云。所愛時聲。比丘比丘尼讀誦音聲。空無我聲。菩
薩解義聲。諸佛演法聲。其耳明利故。悉能分別知。是

爲眼能耳用。又於眼中知無量百千億不可說不可說虛空
十法界香。若依若正。鐵圍大海地中諸眾生。修羅男女
。人勢小輪。羣臣諸宮人。乃至於梵世光音。及有頂。
比丘眾。菩薩眾。在在方世尊。聞香悉能知。是爲眼有
鼻用。卽於眼中。知無量百千萬億。不可說不可說。虛
空世界中眾味法門。於食等於法亦等。如純陀八斛四斗
。爲涅槃佛事。若好不好。若美不美。至其舌根變成上
味。如天甘露無不美者。又知十法界眾生。堪能法味。
於大眾中出深妙聲。能入其心。皆令歡喜。又令天龍人
神。聞其所說言論次第。皆樂來聽受。又諸菩薩諸佛。
常樂向其處說法。聞皆受持。又能出深妙之音。是爲眼
有舌用。卽於眼中。知十法界眾生。百千萬億不可說不
可說虛空等觸。身如淨明鏡。眾生皆喜見。其身淨故。
三千內外依正。山林河海。皆於身中現。地獄已上。有
頂已還。所有正報。生時死時。若好若醜。悉於身中現
。二乘菩薩。悉於身中現。唯獨自明了。餘人所不見。

十方三世佛。從初發心。中間行行。乃至成道。轉法輪。入涅槃。悉於身中現。佛境界既爾。況復餘耶。是為眼中。有身用。又於眼中。能知百千萬億不可說不可思虛空等十法界。所念若干種。一時能悉知。是為眼中有身用。又於眼中。能知百千萬億不可說不可思虛空等十法界。所念若干種。一時能知。是為眼中有意用。其聞聲知香味觸法。亦有互用。皆如上說。當知六識所有無明。所有智慧。並是緣因。緣因種。緣因性。七識所有無明。所有智慧。並是了因。了因種。了因性。八識所有無明。所有智慧。並是了因。了因種。了因性。如是三種種三相三性未發。名為六根清淨。三種若發。即真正開佛知見。若小乘法門。析滅諸根。入空取證。今大乘報身。即是法界。不須更滅。能於諸根。作此互用。故一根具六。六六三十六法門。正受清淨。能此互用。故淨名云。或有佛土光明為佛事。或佛土音聲為佛事。或以香味衣服為佛事。或無言寂滅為佛事。皆此意也。此

有似有真。如法華所明卽相似。如華嚴所說卽是真。故明闇不相除。顯出佛菩提。只言斷。而言卽解脫。只言不斷。復云。結習盡者。華不著身。非斷非不斷中論斷。斷中論不斷。此乃不思議圓融方便。宜斷卽斷。如此土大士。度剛強眾生。宜不斷卽不斷。如香積土聞香。卽入律行也。仁王云。十善菩薩發大心。長別三界苦輪海。十善卽十信也。三界苦。卽界內惑圓融也。大經云。學大乘者。雖有肉眼。名爲佛眼。法華云。雖未得無漏。而其眼根清淨若此。此皆明相似位之文也。若觀如來藏心地法門。卽是觀如來眼耳鼻舌身。豁然真發。得見佛性。或因聞發。三智現前。三身具足。華嚴云。初發心時。便成正覺。所有慧身。不由他悟。得如來一身無量身。湛然應一切。眾生機感。卽能垂應作八相成道。百世界作佛。或現二乘身。利益眾生。乃至作地獄身。利益眾生。諸佛加之。能爲大菩薩說法。此卽發真之文也。三明四念處觀者。先約經示。大經云。其後不久

。王復得病。醫占王病。定應服乳。王者八倒眾生也。其後病者。初倒伏後倒起。故言不久也。定服乳者。應授四榮之術也。正是今之念處意耳。又譬有人。以毒塗鼓。眾中打之。近者死。遠者未死。後打毒鼓。近遠俱死。初塗四枯。止枯分段。故言未死。今塗四榮。無明根斷。故近遠俱死。亦是今四念處意也。又云。如鳥出籠。纔得離網。今二鳥俱飛。高翔遠遊。去住自在。正是今四念處也。又云。初枯生死。不能照明佛法。不能開悟眾生。於佛法無工夫。於眾生無利益。故言枯雙樹。今圓顯佛法。大益眾生。夫有心者。皆當作佛。八千聲聞。得見佛性。如秋收冬藏。成大果實。故言四榮莊嚴雙樹。大經不令噉酒糟。不與特牛同共一羣。不在高原。亦不下濕。下濕者。凡邪四倒也。高原者。偏曲四倒也。酒糟是愚癡。麥麩是瞋恚。特牛是貪欲。選擇中原安處其子。法華云。正直捨方便。但說無上道。不令二乘。獨得滅度。皆以如來滅度而滅度之。開示悟入佛

之知見。解王頂上明珠與之。我本立大願。普令一切眾
。亦同得此道。無智者錯亂。迷惑不信受。是故於今日
。決定說大乘。又云。諸佛法久後。要當說真實。真實
者非生死。非涅槃。無邪無偏。無倒無正。咄哉丈夫。
示昔繫珠。咄哉去來。寶處在近。是故從本垂迹。與法
身眷屬。隱實揚權。藏高設下。共化眾生。開示正道。
內祕外視。令開顯。令得入妙。正是此四念處也。所言
四者。不可思議數。一卽無量。無量卽一。一一皆是法
界。三諦具足。攝一切法。出法界外。更無有法。法界
無法界。具足法界。雖無法。具足諸法。是不思議數也
。華嚴云。一微塵中。具一切塵。及一切法。於一念具
一切念。及一切法。塵卽是色。念卽是心。色心卽念處
異名耳。大品云。四念處。卽摩訶衍。摩訶衍。卽四念
處者。於一念處。與三念處無二無別。一切法趣四念處
。是趣不過。念處尚不可得。云何當有趣不趣。此亦不
思議意同也。普賢觀云。觀心無心。法不住法。名大懺

悔。名莊嚴懺悔。觀心既然。觀色亦爾。大經云。佛性者。亦一非一。非一非非一。亦一者。一切眾生。悉一乘故。非一者。說三乘故。非一非非一者。數非數不決定故。當知四數不可決定。卽不思議之四也。法華經中。八千聲聞。得見佛性。大經云。爲諸聲聞開發慧眼。天親以七種佛性釋法華。當知二經。佛性理同。同圓。同妙。同大。更不異也。而法華以一乘爲宗。約智明法相。涅槃以常爲宗。約定明法相。智定左右之異耳。法華指前經。亦云。以方便力故。爲五比丘說。當文云。正直捨方便。但說無上道。涅槃開前經云。爲贖命故。說大涅槃。明歷別五行十功德。當文云。復有一行。是如來行。所謂大乘大般涅槃。故知二經是同。今取究竟實說處。卽是圓極不可思議四念處也。釋數竟。念者觀慧也。大論云。念想智者。一法異名。初錄心名念。次習行爲想。後成辦名智。處者境也。元從不離薩婆若。能觀之智。照而常寂。名之爲念。所觀之境。寂而常照。

。名之爲處。境寂智亦寂。智照境亦照。一相無相。無相一相。卽是實相。實相卽一實諦。亦名虛空佛性。亦名大般涅槃。如是境智。無二無異。如如之境。卽如如之智。智卽是境。說智及智處。皆名爲般若。亦例云。說處及處智。皆名爲所諦。是非境之境。而言爲境。非智之智。而名爲智。亦名心寂三昧。亦名色寂三昧。亦是明心三昧。亦是明色三昧。請觀音云。身出大智光。如燒紫金山。大經云。光明者。卽是智慧。金光明云。不可思議智境。不可思議智照。此諸經皆明念只是處。處只是念。色心不二。不二而二。爲化眾生。假名說二耳。此之觀慧。只觀眾生一念無明心。此心卽是法性。爲因緣所生。卽空。卽假。卽中。一心三心。三心一心。此觀亦名一切種智。此境亦名一圓諦。一諦三諦。三諦一諦。諸佛爲此一大事因緣。出現於世。欲令眾生佛之知見開。諸佛出世事足。大經云。王夷坦道。無量義經云。行大直道無畱難。故法華名具足道。雖言三智。

其實一心。爲向人說。令易解故。而說爲三。若教道爲言。所斷煩惱。如翻大地。河海俱覆。似崩大樹。根枝悉倒。用此智斷惑。亦復如是。通別塵沙無明。一時清淨。無量功德諸波羅蜜。萬行法門。具足無減。佛法祕藏。悉現在前。大品云。諸法雖空。一心具萬行。大經云。發心畢竟二不別。法華云。本末究竟等。故名妙覺平等道。當知此慧。卽法界心靈之源。三世諸佛無上法母。以法常故。諸佛亦常。樂我淨等亦復如是。亦名寶所。亦名祕藏。佛及一切之所同歸。前三藏隘路不得並行。通教共稟共行共入。入不能深。別教。紆迴歷別遙遠。卽不能達。今此念處。曠若虛空。際於無際。猶如直繩。直入四海。故名圓教四念處耳。張衡曰。翔鷗仰而不逮。況青鳥與黃雀當前。三念處所不能及。唯圓念處孤飛獨運。凌摩絳霄。無上。無等。無等等。豎無高蓋。故言無上。橫無儔列。故言無等。無等等於十方三世諸佛。言無等等也。欲重說此義。更引天親唯識論。

唯是一識。復有分別識。無分別識。分別識者。是識。無分別者。似塵識。一切法界。所有餅衣車乘等。皆是無分別識。成三無性。無性名非安立諦。如彼具說。龍樹云。四念處即摩訶衍。摩訶衍即四念處。一切法趣身念處。即是一性色。得有分別色。無分別色。分別色。如言光明即是智慧也。無分別色。即是法界四大所成。皆是無分別等。是色心不二。彼既得作兩識之名。此亦作兩色之說。若色心相對。離色無心。離心無色。若不得作此分別色。無分別色。云何得作分別識。無分別識耶。若圓說者。亦得唯色唯聲唯香唯味唯觸唯識。若合論。一一法。皆具足法界。諸法等。故般若等。內照既等。外化亦等。即是四隨逐物。情有難易。大論曰。一切法併空。何須更用十諭。答。空有二種。一難解空。二易解空。十諭是易解空。今以易解空。諭難解空。唯識意亦如是。但約唯識。具一切法門。而眾生有兩種。一多著外色。少著內識。二多著內識。少著外色。如

上界多著內識。下二界著外色多內識少。如學問人。多向外解。若約識爲唯識論者。破外向內。今觀明白。十法界法。皆是一識。識空十法界空。識假十法界假。識中十法界亦中。專以內心。破一切法。若外觀十法界。卽見內心。當知若色若識。皆是唯識。若色若識。皆是唯色。今雖說色心兩名。其實只一念無明法性。十法界卽是不可思議。一心具一切。因緣所生法一句。名爲一念無明法性心。若廣說四句成一偈。卽因緣所生心。卽空。卽假。卽中。故般若云。受持一四句偈。與十方虛空等。法華云。聞一偈亦與菩提記。一句亦然。三世亦如是。今觀此。只一心不可思議。十界恆現前。入心地法門。故能不起寂滅。現身八會。只是一句。一句有無量。無量中只一句。是爲不思議故。如心諸佛然。如佛眾生然。是三無差別。諸佛解脫。當於一切眾生心中求。眾生心亦當於諸佛解脫中求。始是般若究竟等。未了者一切法正。一切法邪。不以心分別。卽一切正心。起想

卽癡。無想卽泥洹。此不思議。非青黃赤白。方圓長短。無名無相。究竟寂滅。唯當心知。口不能說。若有因緣善方便。用悉檀亦可得說。以方便力。爲比丘說眾生無量劫。自性心不爲煩惱所染。不染而染。難可了知。迷妄卽染。染卽覆心。不見淨性。是以久處生死。不能返本還源。源實難解。二乘尚不聞其名。何況凡夫。今佛爲作習因。如大通智所繫珠。至釋迦時。方成果實。今此種子。漸漸積習。後遇聲光。發此種子。轉凡入聖。漸漸積功德。具足大悲心。皆已成佛道。若不爾者。無明覆法性。出十法界五陰。重迷積沓。若能超悟。起二乘五陰。乃至佛陰。華嚴云。心如工畫師。造種種五陰。一切世間中。無不由心造。諸陰只心作耳。觀無明心。畢竟無所有。而能出十界諸陰。此卽不思議。如法華云。一念夢行因得果。在一念眠中。無明心。與法性合。起無量煩惱。尋此煩惱。卽得法性。問別圓俱作此譬。云何異。答。別則隔歷。圓則一念具。如芥子含須。

彌山。故名不思議。華嚴性起云。一微塵中有大千經卷。智人開塵出經。是一念無明心。有煩惱法。有智慧法。煩惱是惡塵。善塵。無記塵。開出法身般若解脫。法華云。如是性相等。一界十界百千法界究竟皆等。今觀此無明心。從何而生。為從無明。為從法性。為共為離。若自若他。四皆叵得。名空解脫門。只觀心性。為有為無。為共為離。若常若斷。四倒不可得。名無相解脫門。只此心性。為真為緣。為共為離。非四句所作。名無作解脫門。無生而說生。生十法界相性也。無明性即是實性。亦言無明即是明。明亦不可得。是為入不二法門。但眾生迷倒。不見心之無心。明成無明。云云。問。眾生自性清淨。不為煩惱所染。云何有無明生。答。如前責生相不可得。而作十四難。佛皆不答。設答只長邪見。大品中問。有亦不得道。無亦不得道。乃至四句俱不得道。將非世尊不得道耶。佛答。實得非四句耳。金剛般若云。須菩提。於是中無實無虛。大論摩乾提云。

。瘥法應得道。佛答。汝若證我法。是時自當瘥。佛有時知利益。亦答十四難。如答淨梵志。畢故不造新。答。我已知。汝云何知。無明名故。取有名新。若知無明不起取有。卽知神及世間常無常。眾生只爲愛見。迷於自性。隨逐諸妄。緣輪不息。去道甚遠。五百由旬。普賢觀云。爲恩愛奴。色使我眼。法華云。貪著生愛。則爲所燒。諸苦所因。貪欲爲本。不斷煩惱而入涅槃。無明煩惱。是如來種。若斷煩惱。卽斷佛種。故言不動而運大慈。普覆十界眾生。眾生無量。慈悲亦無量非一廣太不可盡。誓願非一廣大不可盡。是名緣念處。三種一心具足。觀此身受心法智慧性。名性念處。一性念處。一切性念處。觀身受心法定慧均和。能助大道。名共念處。一共念處。一切共念處。觀身受心法所有慈悲。名緣念處。一緣念處。一切緣念處。觀此一念無明心。卽是眾生。眾生卽法性。法性卽摩訶衍。摩訶衍卽十法界性念處。利益十法界眾生。同於四念處。坐道場轉不思

議種種法轉。一切種智。以爲根本。無量功德之所莊嚴。皆令眾生。安置十地。十種珍寶。以爲脚足。枯榮智慧。以爲雙樹。若見佛性非榮非枯。爲中間而般涅槃。雙照二諦。總結四念處。雖別說示人。文言難見。只一刹那心。卽是因緣所生法。因緣心生滅。卽是三藏三十七品。因緣心空。是通三十七品。因緣心假。是別三十七品。因緣心中。非空非假。卽是圓三十七品。只是一念心。若橫無際。若豎無窮。盡三諦源。然此一念。不橫不豎。若心卽空。卽假。卽中。是橫觀。此心先見空。次見假後見中。卽是縱。今諦觀心中三句。實不縱不橫。不前不後。畢竟清淨。廣大法界。究竟虛空。觀心實性。無有微塵知覺。卽是法名不覺。煩惱是道場。斷煩惱不名涅槃。不生煩惱乃名涅槃。煩惱卽菩提。生死卽涅槃。意在修三種念處觀。十界色名身。十界受名受。十界識名心。十界想行名法。法性色。一色一切色。一切色一色。一受一切受。一切受一受。一心一切心。一

切心一心。一想行法一切法。一切法一法。將智慧性。觀十法界色性名爲觀。了達色中非垢非淨。名爲處。智慧性觀十界受性名觀。了達受中非苦非樂性。名爲處。智慧性觀十界心性。名爲觀。了達心性非常非無常性。名爲處。智慧性觀十法界法性。名爲觀。了達法性非我非無我。名爲處。能所合標。名性念處觀也。次釋共念處觀。觀十法界色非垢非淨。雙照二諦垢之與淨。其性無二。無二之性。即是實性。次觀十界受非苦非樂。雙照二諦苦之與樂其性無二。無二之性即是實性。次觀十界心。非常非無常。雙照二諦。常與無常。其性無二。無二之性。即是實性。次觀十界。非常非無常。雙照二諦常與無常。其性無二。無二之性即是實性。次觀十法界非我非無我雙照二諦。我與無我。其性無二。無二之性。即是實性。是名共念處觀。次釋緣念處。菩薩觀此身受心法。無緣慈悲。無緣無念。如磁石吸鐵。寂而常照。雖無念不覺而覺名爲佛。具足恆沙法藏虛空法門。

十方不可說不可說一微塵中法界佛法僧。究盡實相。而無積聚。譬如貧人。多所積聚。乃名藏。解脫不爾。無所積聚。無所積聚。即真解脫。解脫即是如來。無所積聚。乃名虛空。能觀此藏。是大千經卷。聞此大藏。是開佛知見。知見故五眼具足。五眼具足即成菩提。菩提即摩訶般若。即得法身。法身即真解脫。三點不縱不橫。名大涅槃。涅槃名諸佛法界。作是觀心。是入如來室。著如來衣。坐如來座。舉足下足。從道場來。住於佛法矣。如來遺囑。令於念處修道。要在茲乎。問前五停心。六根互用。今念處證何功德。答。前說似解相貌如上。今修念處。進發十住真位。前觀海邊平相。曠蕩若斯。況大海深廣。渺渺浩浩。可以智知。無俟更說。

四念處卷第四

鯁

古杏切
介礙也

罔

居永切
開明也

掠

力仗切
捶擊也

戮

與職同

磁

音慈
引鐵石

四念處功德人名

三寶弟子善成本真寶來寶德悟來共施錢二十一千二百

文

妙湛法燈立行永海不畱名歐陽氏周秀雲楊善信黃善信

鄧善信張善信共施錢二十七千文

滿香手比丘惟清五圓法船二圓蓮航寶蓮微霞月朗各一

圓願鄭開二障圓現一真信士蘇國章仝室吳氏一圓徐明

章吳承翹趙昌益韋普淨趙明舟潘發修戴衛氏戴趙氏劉

周氏各一圓張保田求生淨土二願任李薦翁姑夫妣共四

願章致雲一千文徐仁卿戴景榮各一願張如松孔在寬各

三百文共施資刻此

光緒三年秋江北刻經處識

中華民國六十一年仲夏地藏菩薩聖誕日重刊壹仟部

四念處四卷（全一冊）

（非賣品）

歡迎翻印

印贈者：志蓮精舍華嚴法會

台北市重慶南路三段廿七巷六號

卷 處 念 四

藏版者：美彩色印刷

台北市重慶南路二段廿號

電話：三八七〇一七·三一六五九八

頁 118 第